

奉節縣志卷三十六

藝文補遺

瞿唐峽

國朝

張問陶

峽雨濛濛竟日閒
扁舟真落畫圖間
便將萬管玲瓏筆
難寫瞿唐兩岸山

白鹽赤甲

張問陶

白鹽雲外落赤甲
雨中蟠峽坼天光
細山童石氣完
關河夔府考疏鑿
禹功難孤艇愁風
雪飄飄逼歲寒

奉節縣志

卷三十六

藝文補遺

一

白帝城懷古

劉玉銓

寒沙莽莽峽猿嘯
落木蕭蕭山鳥鳴
不見古人一悵望
滿天風雨吹荒城

白帝城懷古

劉明峻

雄關天塹說公孫
戎馬偏安蹟尙存
嗣子不才空壁壘
老臣無力挽乾坤
山從秦隴合干疊
水赴荆襄爭一門
霸業銷沈王氣盡
荒荒寒日下江村

白帝城懷古

林有孚

連營七百蜀師雄一炬吳江帝業終繼世難
興長樂闕托孤轉在永安宮又逢逐鹿三分
後還見驅狼八陣中舊事荒涼陳蹟賸女牆
空對夕陽紅

瞿唐峽

江國霖

萬峯攢天天爲縮天落峽底光如燭夔州諸
山逼江來長江不受山約束大波欵起山靈
驚豁然峽門闢山腹惟留灩澦一堆石千年
瘦蛻老龍骨突兀一夫當雄關萬弩攻之不

奉節縣志

卷三十六

藝文補遺

二

能仆崢嶸赤甲與白鹽高於旌幢銳於鏃一
峰插雲蟠蒼蛟一峰下溪飲麋鹿峭如奇鬼
生搏人齒牙嶙嶙頭有角散如野叟蹲林間
脫帽露頂坦雙足斷壁巉崖不可攀纍然無
草亦無木何人削山使之禿我知渾沌以前
天地心爭險鬥怪日相逐竟欲截江驅倒流
連山勢若長城築大禹一一疏通之百神効
力聲肅肅巨霸雙掌筆難闢至今山勢尙迫
促不然千崖萬壑間何以刀斧椎鑿痕猶綠

吁嗟乎我生真有山水福天遣奇山盡入蜀
一葉扁舟穩於屋風留三日峽中宿大江東
去已如斯何況西來更有峨眉劍閣褒峽谷

瞿唐峽

劉明峻

羣山奔到此盤折出巴東江派千流合天光
一線通護持夔子國疏鑿禹王功惟有猿聲
苦風濤獨夜中

登赤甲山

劉玉銓

蒼然秋色莽風煙匹馬登臨近碧天巴峽波

奉節縣志

卷三十六

藝文補遺

三

濤明到眼荆門雲樹小如拳仲宣不肯居人
下祖逖無妨讓我先東望海門烽燧裏五陵
佳氣竟何年

謁五侯祠

劉玉銓

宗臣廟貌面江開自奠荒祠酒一杯五丈原
頭星錯隕三分鼎足日難迴羣雄未必能成
事嗣子無如竟不才伏讀出師前後表瀟瀟
風雨暮天哀

謁杜公祠

劉玉銓

誰知愛國忠君意盡入窮愁作浩歌萬里烽
煙鄉信絕五陵衣馬故人多風塵回首思暵
去霜雪盈頭奈老何畢竟涓埃猶未答天涯
吟望苦蹉跎

鹽井

劉玉銓

滿江煙霧白濛濛十萬人家汲取中西晉穿
池王室固南陽煮海霸圖雄地靄釀作洪爐
雪人力休誇滅竈風多少蒼生齊倚賴和羹
終是濟時功

奉節縣志

卷三十六

藝文補遺

四

登步月臺

劉明峻

水不願觀滄海茫茫之萬派山不願登泰華
轟轟之三峰滄海橫流四萬八千里波濤影
中時見蛟與龍泰華孤峰峭峙天半只恐
瘦骨嶙嶙不足當罡風時維二月花朝節匹
馬驕行城之東上有荒台名步月疏鑿鬼斧
兼神工不知何年何人至此卜此地但覺四
面嵐光雲氣青濛濛路轉逕斜蜿蜒上地之
廣狹剛三弓亂石壓頭碎欲裂意奪神驚惟

鞠躬濤聲忽作鳴山谷茫然四顧皆長松盤
鬱已經百餘載根屈以鐵柯撐銅起視夔門
固環抱一聲長嘯風鳴空上有蓮池文峯之
巖崩下有白鹽赤甲之嵒龍梅溪南折入江
水合流兩瀼東西通巨壑劈開瞿唐峽雲中
萬朵青芙蓉灩澦堆更峙亘古一拳石支江
當中我睹此景發狂嘯陡覺蓬蓬勃勃奇氣
橫心胸吾不知千載以上先乎我而去者果
誰到此闢笑容亦不知千載以下後乎我而

來者更有何人相樂從祇覺此時元龍豪氣
不能一毫減仰天直欲飛上碧落通明宮下
瞰人間十二萬年滄桑變而我獨坐蓬萊頂
上酣飲酒千鍾

初到夔州偕門人張幼江張白牆李鶴村
成志南遊白帝寺俯視瞿唐灩澦諸勝

楊德坤

初聞勝地一登臨砥柱中流賴此君千古英
雄渺何許庭前楓葉落紛紛

千秋正氣存諸葛一片心香奉少陵
灩澦波
光峽門月兩般景色共清激

夔府曉望

王樹桐

四川
知縣

潑眼青嵐入望平瞿唐峽口曉雲輕
蒼涼樹色千峰暗鬱曲河光一線明
杜老詩歌餘斷碣公孫霸業剩荒城
前途勒馬頻回首今古茫茫百感生

舟泊夔門

王樹桐

秋水長天爽氣激江山閱歷記吾曾
扁舟又

奉節縣志

卷三十六

藝文補遺

六

向夔門住落日孤城憶少陵

送汪曉潭太守辭官歸里 楊德坤

風裁不減豸冠時舒卷白雲任自爲
道路莫

愁三峽險公路開十壑峽勤能上達九重知黃童

白叟攀轅切紅樹青山放棹遲遺愛尙留書

萬卷公構七書萬一回展誦一回思

魚復城詠古

劉玉璋

赤甲山勢高轟轟長江滾滾齧其足
兩峽忽將江流束萬丈洪波撼山谷
上有古城名魚

復登之可窮千里目東望東屯山簇簇西望夔州繚而曲南有白鹽迎朝旭北有蓮峰翳林麓俯窺江流轉地軸灩澦堆聳江之腹昔公孫述不臣服妄以白龍爲吉卜豈知躍馬事太促井底之蛙奚足錄泊昭烈帝方逐鹿得武侯力都於蜀吳破荊州肆其毒八百里營相接續天意絕漢不可贖先主師竟敗於陸縱使破碎三分局萬古終將正統屬迄今瞿唐浪聲蹙彷彿如聞英雄哭往往遊人撫

古木弔古猶拋淚簌簌吁嗟乎炎漢事業今樵牧君不見城下長江空自綠

偕同人集灤西杜公祠作先生生日

夔之東灤之右嶽嶽草堂傳不朽千二百年來騷壇齊俯首人言公僅詩中豪無救世功被九有豈知古今作者貴性情不尙才華尙忠厚公之大節况錚錚匡君救友徵抱負自宜廟享千秋同韓柳君不見宋元明來人某某各逞箋註希功狗紛紛聚訟相擊掎如墮

雲霧黑如黝又不見摹倣家更如矇眊一字
一句相纏糾斤斤似獸踐其瓜令人讀之悶
欲嘔男兒生不能自樹立傳之千秋後便當
埋頭老戶牖詩之不同如人面效顰何必自
增醜別有齷齪不能辨牝牡以耳代目如水
母強評月旦作知音吾恐捫心顏有忸公詩
如大海海大善藏垢大者蛟龍出沒鯨鯢吼
小者螻蛄雜蝌蚪讀古人詩不善學眯目安
能知去取取長去短古所傳譬彼良農辨苗

莠我生抱詩癖讀公詩如與我友今日誠何
日開筵爲公壽詩王詩史一任四座誇而我
蓬蓬詩興陡詩腸如龍酒如雨龍得時雨神
抖擻左手持杯右持毫摘公一過公其受公
詩必欲泣真宰不襲前人舊窠臼豈知造物
忌才勝於人白頭垂老江湖走詩造極者窮
亦極立錐之地無一畝茫茫千載此例定凡
十詩人窮八九我今捉襟見雙肘十年推敲
空株守詩尙未工窮已極不知窮至何時乃

得上追屠龍手公闢此例公有咎公聞我言
應噤口醉後一語更問公未知大筆容借否

武侯祠詠古

劉玉璋

龍興赫赫推高皇十傳而後篡者王白水眞
人此崛起討賊重使炎漢昌黃巾大亂繼以
卓阿瞞覬覦深包藏卧龍茅廬作高隱先主
得之同伊姜東漢君與後漢相兩人發軔皆
南陽史以昭烈比光武雄才大度眞頡頏况
復雲臺眾將相諸葛一人兼其長創業不異

奉節縣志

卷三十六

藝文補遺

九

成敗異後人往往悲武鄉天意雖曰不可測
終隨人事爲興亡成哀孱弱鮮大失外戚無
端干天綱是時文景澤未竭中興尙易恢舊
疆降及桓霸甚矣憊紛紛黨錮殲忠良人之
云亡國殄瘁如病已入膏與盲魚水君臣力
雖竭安能眷顧迴彼蒼嗚呼出師縱未捷千
秋正統何堂堂迄今君臣共祠宇蘋蘩萬古
長流芳

永安宮懷古

邱景遲

東望獠亭悵敗軍從茲炎祚竟三分平生事
業託丞相天下英雄惟使君夔府城孤寒落
日漢宮秋老鎖愁雲年年故苑鶻聲斷棖觸
幽懷不忍聞

十賢贊

邱景遲

惟楚大夫被讒而逋清兮汨落千載不渝
能藏能行亦將亦相想見其人三代以上
原屈 葛諸

亮

抱稷契志僅以詩王俎豆馨香灑西草堂
甫杜

奉節縣志

卷三十六

藝文補遺

十

不負天子不負所學內相直言誠哉卓卓
上疏忠切嶷然不折百僚師師憚其風烈
處韋

厚

白傅風流謫刺忠州夔門留詠杜老之儔
居白

易

勇昭岳鄂姦戮盛山儒生氣節高不可攀
鎮柳

野渡吟詩詩已見志相業之隆樓臺無地
寇準

以理冤獄以通民情豸冠峩峩更播直聲
唐介

斷頭將軍無受降城吾聞其語凜然如生
嚴顏

奉節縣志卷三十六

詩彙

白帝城懷古

唐 陳子昂

日落滄江晚停橈問土風城臨巴子國臺沒
漢王宮荒服仍周甸深山尙禹功巖懸青壁
斷地險碧流通古木生雲際歸帆出霧中川
途去無限客坐思何窮

早發白帝城

李白

朝辭白帝彩雲間千里江陵一日還兩岸猿

奉節縣志

卷三十六

詩彙

一

聲啼不住輕舟已過萬重山

上白帝城

杜甫

城峻隨天壁樓高望女牆江流思夏后風至
憶襄王老去聞悲角人扶報夕陽公孫初恃
險躍馬意何長

上白帝城二首

杜甫

江城含變態一上一回新天欲今朝雨山歸
萬古春英雄餘事業衰邁久風塵取醉他鄉
客相逢故國人兵戈猶擁蜀賦斂強輸秦不

是煩形勝深慙畏損神

白帝空祠廟孤雲自往來江山城宛轉棟宇
客徘徊勇略今何在當年亦壯哉後人將酒
肉虛殿日塵埃谷鳥鳴還過林花落又開多
慚病無力騎馬入青苔

白帝城

杜甫

白帝城中雲出門白帝城下雨翻盆高江急
峽雷霆鬪古木蒼藤日月昏戎馬不如歸馬
逸千家今有百家存哀哀寡婦誅求盡慟哭

奉節縣志

卷三十六

詩彙

二

秋原何處村

白帝城

胡藩

蜀江一帶向東傾江上巍峩白帝城自古山
河歸聖主子陽虛共漢家爭

白帝城

宋肇

江雨霏霏白帝城秋草未枯春草生古來戰
壘如雲橫萬里瞿唐斷人行至今三峽路崢
嶸時清不見更屯兵荒涼廢堞沒春耕但見
牛羊日西平

白帝城登眺

曾 慥

白帝城頭路透迤一徑遙高堂臨峽口暴水
沒山腰隔岸漁施網橫江鐵貫橋神妃翻覆
手願賜雨聯宵

白帝城

明 陳文燭

縹緲孤城暮欲投振衣直上最高樓公孫躍
馬臺何在漢室人龍業未收雲出雨鳴兼巨
浪藤荒木落正新秋白鹽赤甲山如舊獨立
斜陽送客愁

奉節縣志

卷三十六

詩 彙

三

登白帝城有懷故人李太僕 吳嘉禮

地扼荆梁氣勢雄公孫躍馬此城中業歸赤
帝空呼白水出西巴自向東孤殿嵯峨先主
烈萬年疏鑿禹王功臨風感歎惟杯酒忽憶
蒼髯海上翁

登白帝城

甘爲霖

往歲虛豪興今秋愜壯懷路緣象馬上槎泛
斗牛來樓閣青霄近江山白日開欲留經一
宿容易逼三台

同耿明府登白帝城二首

袁茂英

夔子城邊白帝臺江流環抱氣雄哉巴渝東
下山爲坼象馬中屯石作堆古廟千秋魚水
合安流今日櫂歌來雙旌拂拭浮雲淨笑挽
天河盪酒杯
突兀危城瞰大江萬波浮動勢茫茫夔門日
落風雲暗魚復沙深圖陣黃天立孤根堆豔
瀕地開三峽鎖瞿唐登臨欲賦慙工部瀼水
東西白草堂

奉節縣志

卷三十六

詩彙

四

白帝城懷古

梅國棟

風濤五月下瞿唐白帝遙登思渺茫江水有
聲流漫漫古城無主日荒荒雲深巫峽歸帆
遠草暗黃牛客夢長功業三分何處是殘碑
不見漢文章

和杜少陵白帝城詩

國朝

張鳳翥

城頭烏散未開門城下俄傾白玉盆樹折高
風三峽動石翻急雨一江昏蒼茫龍氣空山
渺寂寞漁竿古渡存唯有扁舟自來往無人

烟水問西村

白帝城

天地依然草木春
荒城試問屬何人
一抔漢土千年淚
萬里閒關百折身
月下子規誰作伴
天涯芳草自成隣
江聲嗚咽無窮恨
歷歷啼鶻說往因

白帝城

傅作楫

瞿唐峽口彩雲間
白帝城南不可攀
西控巴渝收萬壑
東連荆楚壓羣山
花開香鎖魚鳧

奉節縣志

卷三十六

詩彙

五

國月上寒侵
虎豹關別後
天涯漫留戀
幾回

搔首鬢毛斑

白帝城

余啟志

白帝孤城草色齊
登臨遙望野烟低
山分南北連三峽
水滙岷峨下五溪
縱壑松杉憑鶴占
參天樓閣許雲迷
重關壁壘皆陳迹
惟伴棲鴉早晚啼

白帝城

謝永齡

咄咄公孫志
太奢闇奸天
位據三巴城中馬

饜城邊草井裏龍成井底蛙儀仗漫誇新殿
陞乾坤仍屬舊官家空殘粉堞環狐穴苦雨
淒風急暮笳

白帝城

王士正

赤甲白鹽相向生丹青絕壁鬪崢嶸千江一
線虎鬚口萬里孤帆魚復城躍馬雄圖餘壘
蹟卧龍遺廟枕潮聲飛樓直上聞哀角日落
濤頭氣不平

白帝城懷古

方積

奉節縣志

卷三十六

詩彙

六

灘聲嗚咽二千年太息征吳竟不旋家國可
傾兄弟重死生同局股肱賢高江急峽無靈
雨古木荒祠有斷烟知否遺魂猶戀蜀隔林
啼殺五更鶻

登白帝城

陶澍

拍馬西風得得來夔門嶮處立崔嵬蒼烟紅
樹不知暮赤甲白鹽相向開未暇荒涼尋漢
殿且憑談笑上高臺古今何限東流水付與
樽前酒一杯

白帝樓

唐
杜
甫

漠漠虛無裏連連睥睨侵樓光去日遠峽影
入江深臘破思端綺春歸待一金去年梅柳
意還欲攬邊心

白帝城樓

杜
甫

江度寒山閣城高絕塞樓翠屏宜晚對白谷
會深游急急能鳴雁輕輕不下鷗夷陵春色
起漸擬放扁舟

白帝城最高樓

杜
甫

奉節縣志

卷三十六

詩
彙

七

城尖徑仄旌旆愁獨立縹緲之飛樓峽拆雲
霾龍虎卧江清日抱黿鼉游扶桑西枝對斷
石弱水東影隨長流杖藜歎世者誰子泣血
迸空回白頭

峽口二首

杜
甫

峽口大江間西南控百蠻城欹連粉堞岸斷
更青山開闢當天險防隅一水關亂離聞鼓
角秋氣動衰顏

時清關失險世口戟如林去矣英雄事荒哉

割據心蘆花留客晚楓葉坐猿深疲茶煩親
故諸侯數賜金

瞿唐兩崖

杜甫

三峽傳何處雙崖壯此門入天猶石色穿水
忽雲根猿獾鬚髯古蛟龍窟宅尊羲和冬馭
近愁畏日車翻

瞿唐懷古

杜甫

西南萬壑注勅敵兩崖開地與山根裂江從
月窟來削成當白帝空曲隱陽臺疏鑿功雖

奉節縣志

卷三十六

詩彙

八

美陶鈞力大哉

初入峽有感

白居易

瞿唐天下險夜上信難哉崖似雙屏合天如
匹練開逆風驚浪起拔簽暗船來欲識愁多
少高於灩澦堆

入峽

宋蘇轍

舟行瞿唐口兩耳風鳴號渺然長江水千里
投一瓢峽門石爲戶鬱怒水力驕扁舟落中
流浩如一葉飄呼吸信奔浪不復由長篙捩

施破瀆漩畏與亂石遭兩山蹙相值望之不
容舫漸近乃可入白鹽雄且高草木皆倒生
哀叫悲元獠白雲繚長岫零露如飛毛緬惟
涪水年慘蹙病有堯禹益決岷水屢與山鬼
麤摧岡轉大石破地疏洪濤巉巉當道出斬
截肩尾銷峭壁難下迹聯峯斷修腰破處不
生草上不挂鳥巢水怪不盡戮下有龍與鼇
遼哉千萬年禹死遺跡牢豈必見河洛開峽
斯已勞

奉節縣志

卷三十六

詩彙

九

峽口

宋肇

萬里西南路瞿唐據上游峽分山對立江合
水爭流蛟鱷從來患鳳波自古愁幾時分兩
槳歸去幔帆秋

瞿唐行并序

范成大

七月十九日至夔州灩澦撒髮不可犯是夜
水漲及山腹詰旦視灩澦已在水中土人云
此青草齊可以冒險而入遂鼓棹略其頂而
過郡中遣候兵立於山上每一舟平安則搖

幟以招後船白鹽赤甲皆峽口大山黃嵌黑
石皆峽中至險處入峽西岸有聖泉舟人或
向之疾呼曰人渴矣泉卽迸下一杯許復乾
余舟過甚急未試也詩云

川靈知我有歸程一夜漲痕千丈生中流擊
楫洶作氣夾岸簸旗呀失聲不知灩澦在船
底但覺瞿唐如鏡平鑿峽流川狼口破號山
索飲飛泉驚白鹽赤甲轉頭失黑石黃嵌拚
命輕草薺增肥無泊處竹枝凝咽空餘情人

奉節縣志

卷三十六

詩彙

十

間險路此奇絕客裏經心吾飽更劒閣翻成
蜀道易請歌范子瞿唐行

瞿唐峽

陸游

四月欲盡五月來峽中水漲何雄哉浪花高
飛暑路雪灘石怒轉晴天雷千艘萬舸不敢
過篙工柁師心胆破人人陰拱待勢衰誰敢
輕行犯奇禍一朝時去不自由山腹空有沙
痕留君不見陸子歲暮來夔州瞿唐峽口平
如油

入峽

陸游

曉入大溪口是爲瞿唐門長江徑蜀來日夜
東西奔兩山對崔嵬勢如塞乾坤峭壁空仰
視欲上不可捫禹功何巍巍尙覩鑿痕天
不生斯人人皆化魚鼉於時仲冬月水各歸
其源灩澦屹中流百尺呈孤根

瞿唐峽

明孫黃

我從前月來西州錦官城下十日留回船正
值九九節巫山巫峽風颼颼人言灩澦大于

奉節縣志

卷三十六

詩彙

十一

馬瞿唐此時不可下公家王事有程期敢憚
微軀作人鮓人鮓甕頭翻白波怒流觸石爲
爲漩渦柁工敲板助船客破浪一撇如飛梭
灘聲櫓聲歷亂聒緊搖手滑櫓易脫沿洄劃
轉如旋風半側船頭水花沒船頭半沒船尾
高水花作雨飛鬢毛爭牽百丈上崖谷舟子
快捷如猿獠攏船把酒聊自勞因笑輕生博
奇好吟詩未解追謫仙天遣經行蜀中道巴
東東下想安流便指歸州向峽州船到岳陽

應漸穩洞庭霜降水如油

瞿唐天下險

周洪謨

兩崖壁立何險巖巴東大江如一絲杜宇神
功渺何許堯時餘燼誰復知中流灩澦實挺
特如牛如馬夏秋月怒濤掀天萬壑雷巨漩
觸石千層雪湯湯東去幾洄灣虎頭狼尾如
連環赤甲下映人鮪甕黃牛高抗鬼門關憶
昔英雄割據日插木爲梯上絕壁只今四海
盡爲家鎖江鐵柱存何益

奉節縣志

卷三十六

詩彙

十二

瞿唐峽

安 磐

水下夔門灩澦堆一山中斷兩屏開昭君宅
抱琵琶峽神女祠懸雲雨臺側壁倒崖無鳥
過古籐昏樹有猿哀懸燈夜泊風波惡賴此
巫山下下杯

瞿唐峽

來知德

日月成何事江山信已秋往來依塞馬用舍
見韓牛地僻花應老時清景更幽水禽如有
意時過荻花洲

瞿唐峽

國朝 張衍懿

歷數西南險瞿唐自古聞水從天上落路向
石中分如馬驚秋漲哀猿叫夕曛乘流千里
急回首萬重雲

瞿唐峽

樊澤達

誰憑霄漢劈青蒼天險由來古戰場八陣風
雲連灩澦三巴門戶鎖瞿唐烏蠻塞遠江流
合白帝城高草木荒峽路愁人從此始哀猿
啼處過飛航

奉節縣志

卷三十六

詩彙

十三

瞿唐峽

高層雲

連山接巴東地險勢復壯誰闢鴻濛開插天
列青嶂灩澦立江門突兀獻奇壯摩挲兩鐵
柱閱立幾興喪驚濤奔紫崖魚龍不敢傍眾
山自迴合前行欲何向初疑水際窮忽轉天
心曠恍如出甑底沸釜掀層浪赤甲與白鹽
開闔似屏嶂丹黃蒼翠間日色相摩盪割據
慨當年雄長不相讓流覽卧龍圖英姿迴堪
尙探奇自茲始彌覺心神王

瞿唐峽

孫元恆

白帝荒城帶雨昏
瞿唐高浪挾雷奔
雙崖積鐵封三峽
眾水排山爭一門
魚復浦懸魚鳥陣
虎鬚灘變虎狼邨
卧龍躍馬空回首
壯士當關幾併吞

瞿唐峽

張鳳翥

斷碧連青靄危崖瀉碧流
灘隨巴峽盡地與楚天浮
日月迷歸鳥風烟暗素秋
朝宗原有象浩氣此中收

奉節縣志

卷三十六

詩彙

十四

淫瀕歌

樂府

缺名

李膺益州記云瀕瀕堆夏水漲沒數十丈其狀如馬舟人不敢進故曰瀕瀕又曰猶與言舟子取途不決水脈故猶豫也樂府作淫豫坤元錄作允豫

淫豫大如馬瞿唐不可下

樂府

淫豫大如幞瞿

塘不可觸

南史

淫豫大如鼈瞿塘行舟絕淫豫

大如龜瞿塘不可窺

類要

灘頭白渚豎相持條

忽淪沒別無期

水經注

經

灩澦歌

梁簡文帝

灩澦大如馬瞿塘不可下
金沙浮轉多桂浦
忌經過

灩澦堆

唐杜甫

巨石水中央江寒出水長
沈牛答雲雨如馬
戒舟航天意存傾覆神功接
混范干戈連解
纜行止憶垂堂

灩澦堆

杜甫

灩澦既沒孤根深西來水多愁
太陰江天漠

奉節縣志

卷三十六

詩彙

十五

漠鳥雙去風雨時時龍一吟
舟人漁子歌回
首估客胡商淚滿襟寄語舟航惡
年少休翻
鹽井擲黃金

灩澦堆

張祐

霜落夔門樹寒江灩澦孤
狂瀾須此障砥柱
賴誰扶入峽愁孤客當關用
一夫何勞念西
域千載固輿圖

灩澦堆

國朝胡期恆

大江西來四千里爭入夔門一線
天夔門偪

仄不肯受回波捲浪青雲巔白鹽赤甲互犄
角日與水鬪尋戈鋌巴蜀雪消春漲發何人
敢放東吳船奇哉峽口灩澦石巍然獨立江
中間白帝逶迤作屏障瞿唐環繞如晶盤千
溪萬壑雷電激中流一柱來當前有時如象
又如馬出入變化難言詮江流縱橫亦退聽
勢窮力竭翻求憐肯依灩澦別支派安流而
下生迴瀾夔門巫峽二百里本爲險地今平
川乃知天地畏傾覆留此要令江無權共傳
與嵩嶽名並傳

灩澦堆

傅作楫

漭漭長江來誰敢衝其波奇哉灩澦堆乃欲
吞江河白鹽爲犄角赤甲爲長戈象馬戰無
休蛟龍哀乞和涓滴不與海吾意亦難過川
流能幾許晝夜去如梭感此障百靈匪直憂
潛沱灤溪雙鐵柱風雨今如何

灩澦石

王懷曾

不到瞿唐峽焉知灩澦尊羣龍翻地軸一象
塞天門下有支祈鎖旁留陣蹟存忽聞江水
嘯風雨下黃昏

出夔峽

王懷曾

綠破天門立青浮江水來乾坤託孤地風雨
卧龍才花落黃陵廟春歸白帝臺將刀磨灩
澦出匣一鳴雷

白帝懷古

王懷曾

奉節縣志

卷三十六

詩彙

十七

長江不盡千年恨萬馬風濤直下吳落日茫
茫登白帝愁雲鬱鬱似蒼梧明良事付三椽
殿龍虎春消八陣圖一代君臣猶合祀銅臺
人散夜啼烏

白帝城

王懷孟

茫茫一萬八千歲此地誰知白帝城一自英
雄揮淚盡幾人歌哭對江聲公孫何物談王
霸先主無兒託死生不見杜陵老名士草堂
猶得以詩名

子陽城歌

傅作楫

上有子陽下有瞿唐陰幽杳靄天高日荒虎
豹嗥呌蛟龍昂張其山莫極其水莫測劣崑
萬仞盤渦千尺凌霄躍馬臺遊人心兢兢河
山美且雄割據無嘉德王師一至關門夜闢
長江失其險高城失其隘白鹽赤甲空插天
十萬降旗下巖壁兔葵猶發隔江紅杜宇聞
啼春水碧吁嗟乎井底蛙公孫述

登鳳仙觀

觀右有碗兒墳異蹟也

劉海鼇

奉節縣志

卷三十六

詩彙

十八

古寺知何處山高五朵雲仄尋樵子路細訪
碗兒墳老樹當空立疎鐘隔澗聞敲門風謾
謾杳矣滌塵氛

瞿唐峽

張問陶

峽雨濛濛竟日間扁舟眞落畫圖間便將萬
管玲瓏筆難寫瞿唐兩岸山

白帝城

張問陶

直爲高光死英雄獨使君山川猶涕淚城郭
自風雲雉堞臨江出鶻聲隔岸聞巴人眞梗

絕容易話三分

白帝懷古

江國霖

萬山如堞擁夔門曾覆高光舊子孫空仗老
臣麾節鉞憾無餘力挽乾坤雲收八陣銷王
氣浪湧三巴洗淚痕莫向永安宮外望滿江
風雪易黃昏

八陣圖

唐 杜甫

功蓋三分國名成八陣圖江流石不轉遺恨
失吞吳

奉節縣志

卷三十六

詩彙

十九

觀八陣圖

劉禹錫

軒皇傳上略蜀相運神機水落龍蛇出沙平
鵝鸛飛波濤無動勢鱗甲避餘威會有知兵
者臨流指是非

八陣磧

宋 蘇軾

平沙何茫茫髣髴見石蕪縱橫滿江上歲歲
沙水齧孔明死已久誰復辨行列神明非學
到自古不留訣至人心已悟後世徒妄說自
從漢道衰蜂起盡姦傑英雄不相下禍難久

連結驅民市無烟戰野江流血萬人賭一擲
殺盡如沃雪不爲久遠計草草常無法孔明
最後起意欲掃羣孽崎嶇事節制隱忍久不
決志大遂成迂歲月去如瞥六師紛未整一
日英氣折唯餘八陣圖千載壯夔夔

灘石八陣圖

王剛中

我生孔明後相望九百載我想孔明賢巍然
伊呂配奇謀勇略誇雄師大節英風蓋當代
木牛流馬何足言八陣遺蹤千古在我行已

奉節縣志

卷三十六

詩彙

二十

步瞿唐門長灘石壘參差分洪纖高下尺寸
等猶有當年節制存四頭八尾觸處首敵衝
中央兩相救握奇如樞運無窮七縱七擒仍
敢攻規模黃帝已垂文後來得者惟將軍唐
宗李靖拾遺意樂舞旛表徒續紛長江之上
石蟠結江波洶湧石不滅使君何事遽剗除
一夜風雷吼天闕明朝仍舊石縱橫神物護
持人已驚向來守蜀用此法誰知石壘真金
城嗟乎孔明遇不遇則劉公恢大度國險

地狹民力微法出萬全勢未具嗟乎孔明以此用於吳長江內閣魏可圖嗟乎孔明以此用於魏掃平三分歸一簣祇因所遇勢不同勢既不同功亦異嗟乎孔明之心如石堅欲扶漢室還中原事之不救則天耳安肯俯首從曹袁嗟乎孔明如生石不老後世用兵如草草忽然變作六花看便失本真難按考請觀壘石韜機籌江流東去自悠悠英雄得此石外指長與君王靖邊壘

奉節縣志

卷三十六

詩彙

二十一

八陣圖

王十朋

一家天下裂三都忠憤填胸出陣圖千載相知惟白水此心原不爲吞吳

八陣圖

國朝

傅作楫

千里連營制勝難十年生聚漫摧殘北山猛獸何時縛東浦孤雛不可彈劫火祇今餘石壘風雲空自湧江湍傷心八陣圖邊水嗚咽隆中淚未乾

八陣圖

傅作楫

連宵金鼓震殷殷出河干峽捲愁雲黑天沈
落日寒雷霆司石壘神鬼護烟灘遺憾無須
辨君王自永安

八陣圖

吳美秀

圖分八陣萬峯前江上烟溟薄暮天往事已
拚隨樵牧當年曾此駐樓船櫂歌宛轉春濤
外鳥語興亡落照邊爲問忠魂何所托深山
風雨遍啼鵑

八陣圖

李正華

奉節縣志

卷三十六

詩彙

二十二

奇才列石盡玲瓏銳比精兵十萬雄變化能
參天地秘縱橫直與鬼神通江流遺恨悲先
主雲氣含愁泣故宮一片貞誠千古在英風
凜凜月明中

白帝廟詩并序

宋 楊安誠

白帝廟神舊傳以爲公孫述以余考之非
也公孫氏享國日淺轍迹未嘗至夔獨遣
田戎任滿戍江關岑彭入江關不復爲戍
守公孫氏無從廟食按酈道元水經注瞿

唐灘上有神廟甚靈刺史二千石過其下
不敢伐鼓鳴角恐致風雨舟人上水以布
裹篙足不令觸石有聲蓋不謂其神爲公
孫氏瞿唐天下至險必有神物司之但有
廟偶聯白帝城遂從而譌爾余往來三峽
皆託神之庇輒爲賦此庶來者有所考云
蜀江萬壑俱東奔瞿唐喧豖爭一門驚濤駭
浪建瓴下顛崖仆谷相吐吞朋妖窟宅恃幽
阻正晝噴薄陰霾昏靈宮奕奕鎮地險眾瀆

奉節縣志

卷三十六

詩彙

二十三

稟命川祇尊赤甲後聳黃熊躍灩澦前峙青
猿蹲舳艫啣尾下吳楚約束蛟鰐如雞豚舊
傳鼓角致雨雹裹篙不觸撐舟痕綜理脈絡
盡西徼帝假之柄攸司存子陽祚國十年近
此地未省東其轅聯江列炬鐵鎖斷戎滿奔
北無留屯江關回首盡漢幟遺黎何自知公
孫血食漢代定不爾但有故壘山之樊子美
誤信齊東語感慨勇略招英魂山川之靈載
望秩僭僞詎可同時論向來名實久淆溷薦

裸無乃瀆俎膳請從酈元爲考證神理昭昭
斯可原

白帝廟

蘇軾

朔風吹入峽慘慘去何之共指蒼山路來朝
白帝祠荒城秋草滿古樹野籐垂浩蕩荆江
遠淒涼蜀客悲遲回問風俗涕泗憫興衰故
國依然在遺民豈復知一方稱警蹕萬乘擁
旌旗遠略初吞漢雄心豈在夔崎嶇來野廟
閔默愧當時破甑蒸山麥長歌唱竹枝荆邯

奉節縣志

卷三十六

詩彙

二十四

眞壯士吳柱本經師失計雖無及圖王固已
奇猶餘帝王號皎皎在門楣

白帝廟

陸游

參差層顛屋邦人祀公孫力戰死社稷宜享
廟貌尊丈夫貴不撓成敗何足論我欲伐巨
石作碑累千言上陳躍馬壯下斥棄驟昏雖
慚豪偉詞尙慰雄傑魂君王昔玉食何致歆
雞豚願言采芳蘭舞歌薦清尊

公孫述

國朝李暢

殿井白龍起因知有故城壘鄰魚復浦關扼
楚襄兵荒徑盈苔綠飛鳥入夜鳴子陽徒恃
險樹德莫能爭

永安宮

宋蘇軾

千古陵谷變故宮安得存徘徊問耆老惟有
永安門

永安宮

國朝傅作楫

當年此處遺明詔賣履分香一字無嗣子不
才君可取老臣如此罪當誅艱難力盡三分
奉節縣志

卷三十六 詩彙 二十五

鼎終始恩酬六尺孤今日西陵撫松柏青青
依舊鳥空呼

永安宮

周燦 四川學使

瞿唐峽口鎖夔門先主遺宮江上存匡復雄
才光赤漢彌留哀詔痛黃昏霜寒野岫高林
暮日冷溪沙急浪奔寂寞川原空悵望秋風
何處弔英雄

永安宮

許嗣印 夔州知府

先主離宮幾度秋當年遺憾至今留託孤哀

詔天爲碧寄命宏才志未收千載明良懸夜
月三分事業繪雲樓杜鵑叫罷英雄血惟有
虛牕翠欲浮

永安宮故址

吳省欽

四川學使

垂創三分國存亡六尺孤赤符謀復漢黃鉞
忿窺吳持敵師偏劬還軍路不紆蠶叢懸夢
寐魚浦息艱劬峽曠金城倚宮深玉几扶儲
君宏後勅元老亟先趨治命彌留最忠言繼
死俱鳴靈號地坼鵑血濺春徂一自歸喪儼

奉節縣志

卷三十六

詩彙

二十六

重尋別殿無翠華鷓跡竄珠幃蘚痕鋪逝水
長東逕開門遽北俘聽笳牆隱雉過櫂闕朝
烏中道空王業羣雄祇霸圖結亭存體勢立
學改形模下輦魂應戀分香意孰誅由來伊
霍侶主德爲交孚

制勝樓

宋

王延禧

夔子城新築長江便作壕欲兼諸面敵故起
北樓高卽舊基仍峻因時力不勞青天纔咫
尺翠壁似周遭近照東西瀼遙分上下牢百

蠻邊指掌三峽見秋毫帝道方無外皇威到
不毛三鈎間夜鎖八陣縱春遨守土慚非稱
提兵亦謬叨經營皆使指備豫本戎韜功乏
爲山助名加制勝褒登臨欲吟咤深愧杜陵
豪

制勝樓

李燾

畫省容臺記並遊相思相望幾登樓路長久
嘆音塵絕事變還驚歲月流合待鈞天終雅
奏却穿巴峽看橫舟欲酬嘉惠須新語老覺

奉節縣志

卷三十六

詩彙

二十七

枯腸不奈搜

登制勝樓次韻

閻蒼舒

百牢關下幾夔州坐鎮休餘只倚樓赤甲白
鹽齊意氣葛巾羽扇獨風流夜間警柝拋金
鎖春樂熙臺醉玉舟化國舒長公事少眼中
萬象固神搜

制勝樓

王十朋

絕塞依天險高城瞰陣圖公孫曾帝蜀諸葛
欲吞吳樽俎衡千里關山敵萬夫人謀兼地

利端坐靜邊隅

卧龍山

王十朋

我輩逢山眼卽青卧龍頂上喜同登圖留沙
磧懷諸葛詩咏江濱憶少陵巫峽雲飛天一
握瞿唐魚化浪三層藍輿又向人間去回首
林泉愧老僧

卧龍山

查籥

山巔祠貌儼丹青千載懷人爲一登隱隱故
營連白帝茫茫恨水向西陵石根蘭芷香無

奉節縣志

卷三十六

詩彙

二十八

價雲頂松杉翠作層人事天機古難料詩成
試語定中僧

卧龍山

丁謂

日長春老職司閒縱轡因尋負郭山花氣半
飄青靄外泉聲多在白雲間香燈肅肅嚴僧
事鐘梵蕭蕭爽客顏坐有詩人樽有酒擬拋
城市宿禪關

會勝樓

國朝

陳時範

白帝東標甲嶂幽翠華南染幾峰秋乾坤別

是桃花界樓閣翻擎河漢流麝靄香飄巴子
夕雨花雲斂楚宮愁九天洛井開圖障萬古
江山對酒甌

鎮峽堂

吳美秀

漠漠煙雲覆遠岑臺高百尺接城陰密疎紅
樹多風雨明滅青燐自古今寄慨有情頻悵
望客思無那強登臨秋來爽坐江天濶一派
橫流萬壑砧

化龍池

明楊貢

奉節縣志

卷三十六

詩彙

二十九

一沼淵源合千家潤澤通柳連晴岸綠蓮漾
曙波紅有備歌瀉水無虞奏凱風踟躕元宰
意不與習家同

甘夫人墓

國朝吳秀美

風雨暮鴉噪荒荒落日昏我來題片石不敢
弔貞魂墓棘寒煙散山花涕淚存年年芳草
路無復怨王孫

遊咸平寺

柳英

復到曾遊寺山青面面同僧多飛錫去鶴已

逐雲空古樹聊遮屋危廊不蔽風感此長太
息惆悵夕陽紅

峽中鐵鎖

唐 杜甫

世代興亡事有由將軍遠鎮古梁州堪嗟鐵
鎖依然在不鎖瞿唐峽口頭

峽中鐵柱

宋 元不伐

白帝城邊春草生黃牛峽裏水波清追思昭
烈千年事常使英雄氣不平

永安亭

國朝 李成芳
府教授

奉節縣志

卷三十六

詩彙

三十

故宮禾黍總愴神忍把俸錢償酒緡我輩難
忘扶漢意當年幸有託孤人但看棟宇全殊
舊祇覺乾坤又一新亭上池塘亭下水添將

魚水寫君臣

亭下蓄錦鱗數十長缸

兵書匣

舊志載匣在赤甲山風箱匣中

李成芳

紙上談兵總是空不師古法乃英雄陰符萬
卷皆糟粕何事珍藏絕壁中

引水

唐 杜甫

月映瞿唐雲作頂亂石崢嶸俗無井雲安沽

水奴僕悲魚復移居心力省白帝城西萬竹
蟠接筒引水喉不乾人生流滯生理難斗水
何直百憂寬

給水

宋 王十朋

接筒引水下山陬端爲夔民解百憂長使義
泉名不斷莫教人費一錢求

澗槽

國朝 吳秀美

濕破蒼煙徑高泉徑不聞石封一線裊竹引
萬家分夜漲仍添雨晨炊半帶雲文園寂寞

奉節縣志

卷三十六

詩彙

三十一

久渴漱正殷勤

竹枝詞

唐 劉禹錫

白帝城頭春草生白鹽山下蜀江清南人上
來歌一曲北人莫上動鄉情

江上春水新雨晴灑西春水縠紋生橋東橋
西好楊柳人來人去唱歌行

瞿唐嘈嘈十二灘此中道路古來難長恨人
心不如水等閒平地起波瀾

山桃紅花滿山頭蜀江春水拍山流花紅易

衰似郎意水流無限似儂愁

竹枝詞

白居易

瞿唐峽口水煙低白帝城頭月向西唱到竹
枝聲咽處寒猿晴鳥一時啼

竹枝若怨怨何人夜唱山詞歇又聞蠻兒巴
女齊聲唱愁煞江樓病使君

巴東船舫上巴西波面風生兩脚齊水蓼冷
花紅簇簇江蘼濕葉碧萋萋

江畔誰人唱竹枝前聲斷咽後聲遲怪來調

奉節縣志

卷三十六

詩彙

三十二

苦緣詞苦多是江州司馬詩

夔州歌

杜甫

中巴之東巴東山江水開闢流其間白帝高
爲三峽鎮瞿唐險過百牢關

赤甲白鹽俱刺天閭閻繚繞接山顛楓林橘
樹丹青合複道重樓錦繡懸

灤東灤西一萬家江南江北春冬花背飛鶴
子遺瓊蕊相趁鳧雛入蔣牙

武侯祠堂不可忘中有松柏參天長十戈滿

地客愁破雲日如火炎天涼

竹枝歌

宋 范成大

五月五日嵐氣開南門競船爭看來雲安酒
濃麴米賤家家扶得醉人迴

新城果園連灤西枇杷壓枝杏子肥半青半
黃朝出賣日午買鹽沽酒歸

白帝廟前舊無城荒山野草古今情只餘峽
口一堆石恰似人心未肯平

豔瀕如襪瞿唐深魚復陣圖江水心大昌鹽

奉節縣志

卷三十六

詩彙

三十三

船入巫峽十日泝流無信音

竹枝歌

明 楊 慎

夔州府城白帝西家家樓閣層層梯冬雪下
來不到地春水生時與樹齊

日照峰頭紫霧開雪消江面綠波來魚復浦
邊晒網去麝香山下打柴回

上峽舟航風浪多送郎行去爲郎過白鹽紅
錦多多載危石高灘穩穩過

無義灘頭風浪收黃雲開處見黃牛白波一

道青峰裏聽盡猿聲是峽州

夔門懷古

國朝 王陳錫

夔門地處天之末蠶叢開蜀巨壩鑿魚復城
頭漾落暉八陣圖邊風浪惡如何劈開古戰
場多少奸雄咸落魄直至棧毀柱傾時始恨
從前創意錯可嘆公孫井底蛙霸業不圖貽
笑謔攔江鐵鎖盡成灰瞿唐峽水量杯勺千
秋惟仰漢君臣淫預迴瀾嚴鎖鑰關塞愁雲
上下飛啼鵲連夜聲空托總之世事只如此

奉節縣志

卷三十六

詩彙

三十四

羨彼高蹇惟孤鶴何如滿地一漁翁少陵暵
去人寂寞我來夔門廿七年詩酒無緣徒自
薄有時叫嘯亦疏狂鎮日懷愁殮藜藿須知
此外並無求三間茅屋當樓閣時乘霽月與
光風只此便是長生樂

夔門懷古

卓秉恬

華陽人

雲安舊地我重來獨立蒼茫首自回丞相陣
圖餘瓦礫使君宮址但蒿萊喬居曾卜東屯
宅陳策還思別駕才只有江聲流不盡年年

三峽暮爓哀

登夔州城樓

全州門戶壯形模
縱步城頭日未晡
浩蕩江聲下荆楚
巍巍山勢擁夔巫
風帆錯雜過祠宇
沙磧微茫指陣圖
地據雲安雄且傑
名區保障賴吾儒

謂恩遇
堂太守

義正祠

宋 王十朋

老臣苦欲爭天下
嗣子何曾思蜀中
古屋數椽猶廟食
傷心地近永安宮

奉節縣志

卷三十六

詩彙

三十五

義正祠

明 何景明

漂泊依劉計
閒關入蜀身
中原無社稷
亂世有君臣
峽路元通楚
岷江不向秦
空山一祠宇
寂寞翠華春

白帝城謁義正祠

郭 棐

昔年躍馬者
此日更何之
巖嶮青山畔
空餘白帝祠
春風吹旆影
古蹟瞰江湄
事逐犇流遠
情深過客悲
千秋新廟宇
一代儼旌旂
義正名同正
人奇地并奇
明良懽此會
魚水想

當時帝業嗟偏壤臣心壯出師時來淵可躍
運去厦難支星向雲霄墜名同日月垂儀容
遺土木風色滿簷楣峽影涵江淨樓光帶雪
披谷鳥鳴自適林葢開那遲我來瞻拜罷弔
古一題詩

謁義正祠

王嘉言

雄關高峽畔遺堞大江旁一廟丹青在千秋
黍稷香相才過管樂國士數關張魚水當年
合風雲奕世光同心推帝胄戮力振皇綱北

奉節縣志

卷三十六

詩彙

三十六

略連秦隴南經接沔湘平沙圖磊磊遺詔語
琅琅治蜀恩威浹擒蠻籌策良業偏時不利
星隕事堪傷正氣秋天杳休聲岷瀆長峯巒
環戶牖松竹覆宮牆雨後芭蕉碧霜前橘柚
黃歲時陳俎豆冠佩儼趨蹌此地儀型近來
瞻意激揚

義正祠

國朝

王士正

赤甲山頭雲氣蒼楓林蕭瑟落微霜漁人故
壘生秋草鳥道寒空掛夕陽當日君臣真洒

落至今祠廟有輝光江流薄暮聞笳鼓回首
中原淚數行

義正祠

周準

永安宮殿峽江頭一體君臣祀武侯天祖式
臨傳詔夜風雲色變出師秋鳴鑾久絕空山
道籌筆猶懸古驛樓瞻尙死忠謀死孝千秋
配食重詒謀

謁先主廟

唐甫

慘澹風雲會乘時各有人力侔分社稷志屈

奉節縣志

卷三十六

詩彙

三十七

偃經綸復漢留長策中原仗老臣雜耕心未
已歐血事酸辛霸氣西南歇雄圖力數屯錦
江元過楚劍閣復通秦舊俗存祠廟空山泣
鬼神虛檐交鳥道枯木半龍鱗竹送清溪月
苔移玉座春閭閻兒女換歌舞歲時新絕域
歸舟遠荒城繫馬頻如何對搖落況乃久風
塵孰與關張並功臨耿鄧親應天才不小得
士契無鄰遲莫堪帷幄飄零且釣緡向來憂
國淚寂寂洒衣巾

蜀先主廟

劉禹錫

天下英雄氣千秋尙凜然勢分三足鼎業復
五銖錢得相能開國生兒不象賢淒涼蜀故
妓來舞魏宮前

謁先主廟

張儼

扶順繼皇業并吞勢由己天命屈雄圖誰歌
大風起得股肱賢明能以奇用兵何事傷
客情何人居帝京雄名垂竹帛荒陵壓阡
陌終古更何聞悲風入松柏

奉節縣志

卷三十六

詩彙

三十八

題先主廟

宋晁公遡

天地收霸氣邱原餘闕宮野人相指示旁有
若堂封當時大耳兒甚似隆準公夫豈忘故
都崎嶇巴蜀中劃然成三分正爾阨兩雄武
侯抱遺恨秦隴竟莫通獨憐晉昌明千載時
始逢坐看五湖亂蕭條河洛空

先主廟

峽口風高爓夜號孤舟燈火宿烟皋草深廢
井人家少水落寒山雉堞高自古金湯難恃

險當時版築豈知勞永安亦在荒城裏玉殿
淒涼空野蒿

九日謁明良殿

國朝 楊崇

義正祠前拜冕旒四圍秋色望中收垂垣菊
蕊拋香淚繞徑茱萸帶血愁寶座爭陳新黍
稷殘碑猶記舊勳猷同來莫懈登臨興再謁
少陵足勝游

武侯廟

唐甫

遺廟丹青古空山草木長猶聞辭後主不復

奉節縣志

卷三十六

詩彙

三十九

卧南陽

上翁卿請修武侯廟遺像缺落

大賢爲政卽多聞刺史眞符不必分尙有西
郊諸葛廟卧龍無首對江濱

諸葛廟

久遊巴子國屢入武侯祠竹日斜虛寢溪風
滿薄帷君臣當共濟聖賢亦同時翊戴歸先
主并吞更出師蟲蛇穿畫壁巫覡醉蛛絲歟
憶吟梁父躬耕起未遲

古柏行

孔明廟前有古柏柯如青銅根如石霜皮溜
雨四十圍黛色參天二千尺君臣已與時際
會樹木猶爲人愛惜雲來氣接巫峽長月出
寒通雪山白憶昨路繞錦亭東先主武侯同
闕宮崔巍枝幹郊原古窈窕丹青戶牖空落
落盤踞雖得地冥冥孤高多烈風扶持自有
神明力正直原因造化功大廈如傾要樑棟
萬年回首邱山重不露文章世已驚未辭翦

奉節縣志

卷三十六

詩彙

四十

伐誰能送苦心豈容免螻蟻香葉終當宿鸞
鳳志士幽人莫怨嗟古來材大難爲用

古柏

雍陶

密葉四時同一色高枝千歲對孤峯此中疑
有精靈在爲見盤根似卧龍

武侯祠

宋

王十朋

八陣圖旁丞相祠風雲慘淡會當時功成豈
止三分漢才大非惟十倍丕渭上忽傳司馬
走蜀中長止卧龍思我來再拜瞻遺像淚滿

襟如老杜詩

武侯新祠

王十朋

山藏古寺柏青青地重端因蜀相登沙上不
聞江轉石人間幾見谷爲陵龍蛇樹影搖千
尺玉雪花枝吐萬層堪嘆草廬誰復顧凄然
香火却依僧

武侯祠

張瓚

帝城誰送應商金故壘蕭蕭歲月深山勢北
來連鳥道水聲東去作龍吟西風老樹惟寒

奉節縣志

卷三十六

詩彙

四十一

雀落月荒郊只暮砧不有少陵詩句在草堂
何處共追尋

武侯祠

張震

勳業場中託汗青詩書臺上復誰登顧廬可
是依元德持竿何妨屈子陵力挽狂瀾休轉
石功虧累土不成層他年一笑三生夢應愧
多情碧眼僧

武侯祠

國朝

謝永齡

抱膝長吟似懶殘徐徐高卧日三竿全憑寧

靜甘沈晦一許馳驅矢肺肝討賊曾經師六
出依劉豈肯地偏安由來祠宇臨江上志在
澄清水也寒

弔諸葛武侯

王藻鑑

卧龍方起寸心雄千古經綸在眼中輔漢書
呈二次表忠劉費盡一生功南陽舊宅餘衰
草西蜀殘魂泣故宮未捷先生應有恨夕陽
雖墜旦仍紅

西園二首

在夔先
寓此

唐杜

甫

奉節縣志

卷三十六

詩彙

四十二

巫山小搖落碧色見松林百鳥各相命孤雲
無自心層軒俯江壁要路亦高深朱紱猶紗
帽新詩近玉琴功名不早立衰疾謝知音哀
世非王粲終朝學越吟

懶心似江水日夜向滄洲不道含香賤其如
鑷白休經過凋碧柳蕭瑟倚朱樓畢娶何時
竟消中得自由豪華看古往服食寄冥搜詩
盡人間興兼須入海求

西閣曝日

凜冽倦元冬負暄嗜飛閣羲和流德澤顛頊
愧倚蕩毛髮且自私肌膚潛沃若太陽信深
仁衰氣歛有託歆傾煩注眼容易收病脚瀏
漓木杪爓翩翩山頂鶴朋知苦聚散哀樂日
已作卽事會賦詩人生忽如昨古來遭喪亂
聖賢盡蕭索胡爲將暮年憂世心力弱

西閣雨望

樓雨沾雲幔山寒著水城徑添沙面出湍減
石棱生菊蕊淒疏放松林駐遠情滂沱朱檻

奉節縣志

卷三十六

詩彙

四十三

溼萬里傍檐楹

西閣夜

恍惚寒江暮逶迤白霧昏山虛風落石樓靜
月侵門擊柝可憐子無衣何處邨時危關百
慮盜賊爾猶存

草閣

草閣臨無地柴扉永不關魚龍迴夜水星月
動秋山久露晴初溼高雲薄未還泛舟慙小
婦飄泊損紅顏

灤西寒望

水色含羣動朝光切太虛年侵頻悵望興遠
一蕭疎猿挂時相學鷗行迥自如瞿唐春欲
至定卜灤西居

入宅三首 刪一

奔峭背赤甲斷崖當白鹽客居愧遷次春色
漸多添花亞欲移竹鳥窺新捲簾衰年不敢
恨勝槩欲相兼

亂後居難定春歸客未還水生魚復浦雲暖

奉節縣志

卷三十六

詩彙

四十四

麝香山半頂梳頭白過眉杖杖斑相看多使
者一一問函關

卜居

歸羨遼東鶴吟同楚執珪未成遊碧海著處
覓丹梯雲嶂寬江北春耕破灤西桃紅客若
至定似昔人迷

暮春題灤西新賃草屋五首 刪二

久嗟三峽客再與暮春期百舌欲無語繁花
能幾時谷虛雷氣薄波亂日華遲戰伐何由

定哀傷不在茲

綵雲陰復白錦樹曉來青身世雙蓬鬢乾坤
一草亭哀歌時自惜醉舞爲誰醒細雨荷鋤
立江猿吟翠屏

欲陳濟世策已老尙書郎不息豺狼鬪空慙
鴛鷺行時危人事急風逆羽毛傷落日悲江
漢中宵淚滿牀

小園

由來巫峽水本是楚人家客病留因藥春深

奉節縣志

卷三十六

詩彙

四十五

買爲花秋庭風落果灤岸雨頽沙問俗營寒
事將詩待物華

自灤西荆扉且移居東屯茅屋四首

二刪

白鹽危嶠北赤甲古城東平地一川穩高山
四面同烟霜淒野日秔稻熟天風人事傷蓬
轉吾將守桂叢

牢落西江外參差北戶間久遊巴子國卧病
楚人山幽獨移佳境清深隔遠關寒空見鴛
鷺迴首憶朝班

東屯北崦

盜賊浮生困誅求異俗貧空邨惟見鳥落日
不逢人步壑風吹面看松露滴身遠山回白
首戰地有黃塵

東屯月夜

抱病漂萍老防邊舊穀屯春農親異俗歲月
在衡門青女霜楓重黃牛峽水喧泥留虎鬪
迹月掛客愁邨喬木澄稀影輕雲倚細根數
驚聞雀噪暫睡想猿蹲日轉東方白風來北

奉節縣志

卷三十六

詩彙

四十六

斗昏天寒不成寐無夢寄歸魂

從驛次草堂復至東屯茅屋二首

刪一

短景難高卧衰年強此身山家蒸栗煖野飯
射麋新世路知交薄門庭畏客頻牧童斯在
眼田父實爲隣

暫住白帝復還東屯

復作歸田去猶殘穫稻功築場憐穴蟻拾穗
許邨童落杵光輝白除芒子粒紅加餐可扶
老倉廩慰飄蓬

杜甫宅

宋 王十朋

少陵別業古東屯一飯遺忠畝畝存我輩月
叨官九斗須知粒粒是君恩

杜工部祠二首

王十朋

宦遊夔子兩經年未到東屯意歉然端爲先
生舊吟處不應容易上詩篇
忠不忘君句有神當時無地可容身草堂遺
像英靈在又見匙翻雪稻新

西灤草堂

明 王三善 太邱

奉節縣志

卷三十六

詩彙

四十七

灤外林深擬上方誅茅日日對瞿唐砌成秋
興詩爲癖簾捲雲輸月到牀瓠落簪裾千里
夢刀頭閭井一浮觥先生故作吟愁曲豈有
先生遜楚狂

題少陵畫像

國朝 程可則

杜陵老子生絕奇蒼髯頰面英雄姿似茲不
合久貧賤曷爲坎壈長歛歛一從作賦獻三
禮承恩暫却河西尉當時何曾解愛才楚水
吳山半流滯忽然鞞鼓動長安玉輦西遊蜀

道難三川奔走空皮骨羣盜縱橫但鷓冠中
興上謁趨靈武拾遺侃侃居言路直節何妨
掾友生諫書反得君王怒牢落天涯走鄴州
負薪采橡窮且愁微官棄去一何恨可憐事
業藏沙鷗劍南直入依巖幕散髮戎渝致非
惡春流無恙下夔門秋色蕭然卧西閣晚年
出峽望衡山楚水茫茫湘漢間酒酣賚志仰
天哭咫尺襄樊那得還一生落拓無窮已獨
有豪吟號詩史同時比肩僅李白後來作者

奉節縣志

卷三十六

詩彙

四十八

紛誰是鄴陵先生絕世雄讀書萬卷身乘驄
稱詩酷擬草堂作沈鬱頓挫將無同昔年作
吏問秦國工部祠堂拜顏色傳與丹青作畫
圖曠代風流盡相識嗟哉杜陵一沒已千秋
吾徒仰止空悠悠先生望古有殊契神交豈
直形爲謀我亦弱齡重高詠乞將粉本歸南
州

草堂

國朝

王知人

人世偏宜客江邊對草堂古人不可見我意

獨徬徨春老山容淡苔深雨色蒼沙明鷗鷺
穩樵徑滿斜陽

杜甫宅

王知人

浩蕩乾坤裏何勞寄姓名屋荒留恨色秋罄
誦詩聲舒傲臨邱壑移喧遠市城依然蘿月
在疏雨暮潮平

咏懷杜少陵

李暢

因愛名區好來鄰灤水東鹽山高迫案峽口
勁回風猿掛因時見江聲入夜逢祇餘草堂

奉節縣志

卷三十六

詩彙

四十九

下未拜少陵翁

灤溪草堂

傅作楫

一代風流鮮頡頑幾年飄泊灤溪傍攤書只
對青山靜把釣惟看綠水長舊恨空搔雙短
鬢新詩漫索九迴腸自憐我亦悲秋客皂帽
何時過草堂

杜工部祠五首

王士正

萬古灤西宅斜連峽口關高雲魚復縣秋水
麝香山老作諸侯客心依供奉班樊川臨素

滄遺恨不生還

白髮三川客新詩百鍊功飄零逐猿鳥得失
感鷄蟲弟妹干戈裏朝廷涕淚中浣花形勝
地回首雪山風

浩劫遺祠在依然白帝城岸連巫峽影門對
蜀江聲太息隆中業平生庾信情艱難詩萬
首夔府至今名

已見浮三峽還憐到九嶷湘娥何處是楚客
至今悲槎擊南溟近天連北斗垂江陵空望

奉節縣志

卷三十六

詩彙

五十

幸愁絕侍臣詩

欲去頻回首停舟灩澦堆東屯渺雲水西閣
莽蒿萊感事悲諸將懷人賦八哀昆明遺碣
在落葉滿蒼苔

杜公祠落成

江

權

新安

拾遺垂老客江鄉楚塞秦關入望長鳥道千
盤過隴蜀鯨波一棹隔荆襄孤衷展轉惟憂
國白髮棲遲祇自傷灤水東西歌嘯地定知
陟降在斯堂

詩史堂

宋 王十朋

誰鐫堂上石光豔少陵章莫作詩人看斯文
似子長

蓮花山宋濂初厝處

國朝 陶 澍

蓮花山俯夔州署曾是宋公埋骨處玉棺移
葬華陽西抔土人猶識遺厝當年應運開太
平禮賢館內皆人英仙華山客最博雅文章
一代推先聲天子尊賢兼尙齒歡飲親呼醉
學士朕有孫兮卿教之朕教卿孫亦如此豈

奉節縣志

卷三十六

詩彙

五十一

知一朝黨禍興竟殺卿孫戍卿死吁嗟乎飛
鳥盡兮良弓藏穎韓功大皆誅亡怪公儒生
事文墨何關殺運投要荒從此朝廷無老宿
馴致齊黃秉鈞軸天道明明每好還轉眼十
戈生骨月

蓮花池

李正華

涪陵簽判楚名賢身帶烟霞別有天流水行
雲魚復浦光風吹沼放紅蓮

蓮花池懷古

李 暢

寶頂固陵地何來道州香名賢憇息處鴻爪
印雪霜光風霽月品林壑意獨長簽判石照
日依依灤溪旁高山戀赤甲流水慕瞿唐盤
桓無窘束瀟洒任徜徉一從遷國子景行意
不忘爲讀愛蓮說遍植水雲鄉翠蓋年年綠
名花至今芳大道無生滅池與人同光嗟予
生也晚未得一登堂日捧太極圖主靜最爲
良

十賢堂

宋 王十朋

奉節縣志

卷三十六

詩彙

五十二

舊名歲寒堂一名忠孝堂祀屈原諸葛亮嚴
挺之杜甫陸贄韋昭範白居易柳鎮寇準唐
介十人畫像於堂中
外栽修竹林栗有記

六月修筠帶雨移丁甯護取歲寒枝十賢清
節高千古不是此君誰與宜

屈大夫

大夫楚忠臣哀哉以讒逐遺廟大江濱醒清
古今獨

諸葛武侯

臥龍起南陽不爲鼎一足托名蜀丞相相漢

非相蜀

嚴刺史

將軍頭可斷詎肯以城降斯可爲忠矣至今
名此邦

少陵先生

子美稷契志空抱竟無用夔州三百篇高配
風雅頌

陸宣公

敬輿避讒謗閉門不著書活人集名方炳然

奉節縣志

卷三十六

詩彙

五十三

仁義餘

韋丞相

韋侯守盛山賦詩十二首能以堯事君遂令
詩不朽

白文公

賦詠窮三峽樂天在忠州苟不以直道亦如
元與劉

柳文公

柳公本書生忠勇著岳鄂盛山戮姦吏餘威

震彝落

寇萊公

萊文經濟業志在巴東詩斯人不復見亭上

秋風悲

唐質肅公

子方筮仕年牛刀割魚復一朝峩廡冠風采

百寮肅

十賢詠

國朝 張鳳翥

十賢宦游于夔以文章勳業著者宋太守王公梅溪哀而祀之曰十賢堂日久堂廢乾隆

奉節縣志

卷三十六

詩彙

五十四

丙戌萊陽仲公守夔祀于蓮峯書院配以蓮梅溪潛溪故祀于蓮花池舊倣顏延年五君詠而各繫以詩

楚左徒屈原

懷王入虎狼左徒葬魚腹理鑒達人藏數窮

詹尹卜哀怨寄離騷千秋正始續楚宮渺荒

烟風雅留芳躅

漢丞相諸葛亮

大星落中原君子識天運漢室有宗臣南陽

自肥遁受遺知旦才陳表法伊訓陣圖凌寒

江風雲起悲憤

唐萬州刺史嚴挺之

嚴公大可用奸相蔽主聰縮符巴山裏卧病
閒曹中絃歌化雕面清政流惠風至今甘棠
樹猶與歲寒同

唐檢校工部員外郎杜甫

志在稷契間名落江湖裏干戈滯扁舟文藝
仰詩史峽江猿鳥哀高閣雞蟲比遺蹟浣花
溪乾坤草堂耳

奉節縣志

卷三十六

詩彙

五十五

唐少傅白居易

香山老居士一麾乃出守古洞誌摩崖巴臺
盛文酒新詩長慶格履道樂天叟東坡發古
懷蠻雲結花柳

宋巴東令寇準

寇公存大體特筆書澶淵雷陽去終已犢豕
戒未然淒涼道旁竹慘淡故墟烟秋風動巴
峽芭舞咽寒泉

宋合州倅知南康軍周敦頤

先生關洛師沈淪簿書內決獄稱神明講學
啓盲昧蓮花契真修風月洗俗類高峯肅景
行臨池奠清酌

宋奉節令唐介

唐公眞御史丹陛流直聲義並荀陳節志偕
房魏貞昔爲神明宰巴江垂儀型梅溪表風
操高祠播芳馨

宋夔州太守王十朋

梅溪守夔門不愧大科選省賦除馬綱捐縉

奉節縣志

卷三十六

詩彙

五十六

利井堰懷清翠竹森覽古香蘋薦遺堂思十
賢高風起遐眄

明翰林學士宋濂

直儒翌天運蔚爲五經師抗陳匡劉疏揮灑
燕許詞老辭山中駕蛻歸巴江湄青蠅污白
馬宿草至今悲

按十賢堂作于宋慶歷間林栗有記非王刺
朋所作王公特爲之題詠耳第三首題嚴刺
十賢之名而顏去語陸贄仲萊陽太守人既慕
周濂溪王梅溪宋潛溪三人於
理亦未安添可也去潛溪不可也

謁十賢堂

卓秉恬

華陽人

炳麟經濟與文章祠宇東連萬仞牆千載以
來賢哲萃十人而已姓名香豐功直比巴山
峻遺愛還偕蜀水長時代雖殊同不朽楷模
多士示周行

武侯陣圖

十二名景

王知人

無勞樵牧愍勤說此是當年八陣圖報主不
遺生活計丹忠猶下死工夫寒流脈脈縈荒
磧苦雨蕭蕭走夜蘆浩魄不磨英氣在空林

奉節縣志

卷三十六

詩彙

五十七

婉轉亂啼鳥

灩澦迴瀾

神禹推承造化功故留突兀大江中三更出
沒魚龍哭萬里奔騰鼓角雄湘楚有峰皆向
北巴渝無派不朝東風風雨雨波濤老峽口
依然倚碧空

青甲晴暉

爲憐海內文章客赤甲三年再卜居遯跡林
泉同鹿豕甘心天地老樵漁巖前丹嶂將何

似雨後晴霞總不如最是霜林初醉後滿天
楓葉落來踈

白鹽曙色

幾杵踈鐘度遠林雞聲喔喔夜沈沈諸峯不
定氤氳色三峽依然浩蕩深疑是層霜覆石
骨更憐曉月到天心推窗夢斷江濤急指點
寒空次第吟

草堂遺韻

鼙鼓漁陽勢若奔吞聲野老下夔門青山一

奉節縣志

卷三十六

詩彙

五十八

帶圍寒骨茅屋三椽慰旅魂邈矣逸懷付斷
壘至今詩色滿江村菜花蛺蝶啼鶻淚爲報
春風護綠原

峽門秋月

扁舟晚泊峽門秋冷月寒山色欲浮掩映荻
花窺石壁參差楓葉隱飛樓青猿喚破三生
夢白露重添一段愁吹徹玉笙銀漢曲東風
展翼到丹邱

瞿唐凝碧

石骨蒼蒼秋不肥高巖千丈薜蘿衣花酣灘
瀨無顏色猿立黃昏說是非落落孤懷依夢
斷踈踈暮雨傍林飛苔痕掃破攤書坐擬對
江天理釣磯

魚浦澄清

採得菱窠滿畫船蘭橈衝破一溪烟秋水碧
痕容能淡雨後澄波色倍妍數盡芙蓉千片
瘦閒來鷗鷺一生眠江村幾處黃昏月夢裏
漁歌風外傳

奉節縣志

卷三十六

詩彙

五十九

文峰瑞彩

廖賡謨

削就峯尖立翠微文光燭處彩雲飛乾坤擎
出江郎筆綺繡分來織女機不架珊瑚供玉
案自從奎壁耀彤闈如椽那假王珣夢信手
烟霧得意揮

白帝層巒

白帝英靈安在哉江天寂寥鬱崔嵬霸圖已
逐東流盡巒氣長凌北極開絕巘翻留雲卧
穩層崖欲逼鳥飛回扶桑弱水供酬接憑眺

還須杜甫才

龍岡聳秀

乾坤闢處一龍眠
閱歷塵寰歲幾千
勢際飛騰雲雨會
光搖麟甲斗牛邊
翠華不辨晴霞裏
碧海堪從曉嶂緣
可惜南陽高卧地
空留遺蹟冷荒煙

蓮池流芳

幾看人世變滄桑
嶺上蓮池歲月長
太極能開天地祕
名花應徧水雲鄉
蠻風不折田田

奉節縣志

卷三十六

詩彙

六十

葉瘴雨時聞冉冉香
我欲移根西閣下
少陵詩句並流芳

赤甲晴輝

張宗世

岸然張掖竦晴空
袒裸猶存太古風
我正昂頭向天外
君先振臂入雲中
山肩高聳如人瘦
苔髮全無訝爾童
火色漫誇騰上速
日光寵借十分紅

白鹽曙色

玉峰初日白於霜
彷彿鹽堆萬仞岡
潤下祇

疑鹹可作居高偏似淡相忘好澄銀海看朝
爽莫倚冰山抗太陽須識空中皆幻影還從
平旦發清光

峽門秋月

燭龍不照古陰崖偏有明蟾度嶺來三峽憑
將秋送入雙門似被月推開當關以望珠懸
闕排闥而登鏡在臺好景一年剛一見莫辭
風露立蒼苔

白帝層巒

奉節縣志

卷三十六

詩彙

六十一

巴天白帝接金天箭栝門通蜀道閒玉女盆
傾三峽水仙人掌擘五丁山石城高壓公孫
壘鐵鎖橫穿吾彥關欲把層巒比西岳彩雲
多處拄筇攀

瞿唐凝碧

自吟人鮓甕頭詩如馬如牛想像之何意瞿
唐天下險化作凝碧日邊池澄同古井無波
起黝似靈湫欲唾疑料得驪龍方睡熟放舟
急過勿遲遲

灩澦迴瀾

觀瀾曾到小孤隈
奇境終輸灩澦堆
江似文星原喜曲
波如舞袖每重迴
排三峽倒非無力
障百川東信有才
君看詞源圓折處
滔滔滾滾逼人來

草堂遺韻

一別成都錦水邊
草堂誰構待名賢
不如歸去蓬頻轉
且住爲佳屋數椽
登最高樓看白帝
攜驚人句問青天
惜公厭醉雲安酒
却上

奉節縣志

卷三十六

詩彙

六十二

湖南萬里船

蓮池流芳

愛蓮人鑿種蓮塘
欲引濂溪到蜀岡
花似來從君子國
池還喜近謫仙鄉
廉泉讓水滋培久
霽月光風樂育長
玉井雖聞開十丈
何如清遠沐餘芳

龍岡聳秀

蜀岡形勢異隆中
底似南陽有卧龍
三顧起揮熊虎將
一圖來定鳥蛇蹤
風雲氣壯西陵

峽吟嘯聲騰北崦松欲問茅廬在何處永安
城角最高峰

魚浦澄清

南浦風煙接固陵盤渦亂石起峻嶒當年魚
復曾名縣終古龍門不易登峽影倒涵千尺
練天光圓浸一壺冰還聞太史河如鏡照見
寰區萬象澈時黃河清

武侯陣圖

神人遊戲寓深謀草木兵驅到石頭方陣圖

奉節縣志

卷三十六

詩彙

六十三

留夔子國陰符祕洩武鄉侯至今磧尙盤龍
虎當日機同運馬牛莫遣初平輕看破防他
一笑起貔貅

文峰瑞彩

倒插凌雲筆一枝畫天手段學庖犧陣圖詎
足當文戰字水惟堪作硯池得意秋風垂露
日疾書春雨放花時南山便是珊瑚架誰把
如椽巨管持

灤水西流至南門以上入江前未有也

清溪如帶繞城浮
城似腰圍月似鈎
千頃靈泉從北下
一灣弱水向西流
詞源倒注驚三峽
瓊海迴波效十洲
灩澦餘瀾翻未了
又看東灤上南樓

灤水源出千頃池

瞿唐峽

僧瘦木

險阨瞿唐口
崖碑跡尙存
連山通楚國
奔浪撼夔門
關塞今名地
風雲古戰屯
猿聲淒絕處
賈客黯銷魂

奉節縣志卷三十六

藝文

昔司馬子長作史記備錄賈董制策而子雲相如詞賦繼之蕭選則三都兩京尤賅洽焉奉邑山勢峭拔砥柱全川名流遊覽所在鴻章鉅製美不勝收節其要者錄之後有作者讀其文慨然想見其爲人志藝文

文彙上

請減繁費增設學校奏記

唐

劉禹錫刺史

奉節縣志

卷三十六

藝文

一

言者謂天下少士而不知養材之道鬱堙不揚非天不生材也是不耕而歎廩庾之無餘可乎貞觀時學舍千二百區生徒三千餘外夷遣子弟入附者五國今室廬圯廢生徒衰少非學官不振病無貲以給之也凡學官春秋釋奠於先師斯止辟雍類宮非及天下今州縣咸以春秋上丁有事孔子廟其禮不應古甚非孔子意漢初羣臣起屠販故孝惠高后開置原廟於郡國逮元帝時韋元成遂議

之夫子孫尙不敢違禮饗其祖况後學師先
聖道而欲違之傳曰祭不欲數又曰祭神如
神在與其煩於薦饗孰若行其教令教令頽
靡而以非禮之祀媚之儒者所宜疾竊觀歷
代無有是事武德初詔國學立周公孔子廟
四時祭貞觀中詔修孔子廟兗州後許敬宗
等奏天下州縣置三獻官其他如立社元宗
與儒臣議罷釋奠牲牢薦酒脯食王孫林甫
爲宰相不涉學使御史中丞王敬從以明衣

奉節縣志

卷三十六

藝文

二

牲牢著爲令遂無有非之者今夔四縣歲釋
奠費十六萬舉天下州縣歲費凡四千萬適
資三獻官飾衣裳飴妻子於學無補也請下
禮官博士議罷天下州縣牲牢衣幣春秋祭
如開元時籍其資半畀所隸州縣使增學校
舉半歸太學猶不下萬計可以營學室具器
用豐饌食增掌故以備使令儒官各加稍食
州縣進士皆立程督則貞觀之風粲然可復

矣

爰獻通考憲宗時夔州刺史劉禹錫嘗歎
天下學校廢乃奏記宰相當時不用其言

魚復扞關銘并序

宋李 臺州知 夔

古梁州域實兼巴漢庸蜀地漢孝武改梁曰益梁州總八郡梁之爲言強也益之爲言阨也此昔聖賢察其風俗按其形勢而爲之名也故其人則強毅精敏嗜義負勇其地則山屏水塹險介重阻沃野叢墳幅員萬里北以劍門爲限東以魚復爲守此二物者蜀之襟喉扞闐也戰國交侵楚肅四年始建扞關漢在魚復置江關都尉以魚復設尉治東漢省

奉節縣志

卷三十六

藝文

三

尉而關如故東漢志有扞水扞關不言都尉秦張儀說楚謂下水而浮不十日而拒扞關蜀李雄說公孫述謂東守巴郡拒扞關之口皆指此魏酈道元注水經謂扞關乃廩君所置唐章懷太子注范史謂關故基在夷陵巴山縣巴山縣自唐天寶八年爲巴山郡界二說皆非也蓋魚復之有關尙矣無事則嚴封域察姦軼有急則扼險要扞凌暴有國者所宜致謹也雖然嘗考諸古劍門以漢中武都

爲屏蔽失漢中武都則劍閣不足賴矣魚復以秭歸夷陵爲保障失秭歸夷陵則魚復不可恃矣考秦以下以迄本朝舉兵定蜀者凡十有三唯秦之司馬錯漢之來歙魏之鄧艾鍾會苻秦之楊安後魏之尉遲迴隋之梁睿唐之高崇文後唐之郭崇韜本朝之王全斌實出劍門陰平道至若吳漢若岑彭若諸葛亮若桓溫若劉毅朱齡石以及劉光義皆擁舟師西指遡江扣關麾城擻邑易如拾芥耳

何者皆以先得秭歸夷陵也漢昭烈襲取劉璋旣北收漢中卽東爭夷陵嗚呼若昭烈者可謂能知保蜀矣功之不遂此天也然而劉禪繼世猶以苟安者徒以與孫氏交歡也且蜀與吳楚爲脣齒之國兩全則固一失則危是以自古在昔欲圖江南者必先巴蜀何者地勢便兵力接也秦取楚晉取吳隋取陳耀兵上游舫船載卒乘流而東曾不頓一刀折一矢而荆揚之區已望風褫氣矣苻堅伐晉

亦分軍而下不幸苻融之兵先敗于淝水故不能成功以此知英雄圖事後先一揆然則蜀之重也審矣自古或言蜀人嗜亂喜禍故所以制御操切之者尤盡其術嗚呼何其過也吾觀從昔亂蜀者皆非其國之人率由姦雄乘隙外至因竊據焉而蜀人莫之與抗蓋公孫述首禍於卒正扶風人劉焉蓄奸于州牧竟陵人鍾會兆謀於降將潁川人李特奮跡於流人略陽人程道養怨激於苛刻枹罕人劉季連計

奉節縣志

卷三十六

藝文

五

成於犄奪

彭城人

司馬勳出於王族蕭紀興於

帝胄王謙啟釁於易代

太原人

劉闢席亂於留

後王建發蹤於椎埋

舞陽人

孟知祥紹難于違

復

荊州人

惟東晉譙縱本宕渠人然縱之初起

實出逼脅觀其倉皇赴江以逃則知縱本庸人初無異志劫于羣叛不能自還若述焉以下數子者則其險詭睥睨有從來矣彼見蜀之險足恃蜀之富足資趯然動心逆節萌起蓋觀劍門之險而追笑劉禪覽兵甲之盛而

思效昭烈而蜀之人形格勢制不能不折而從之其間能截然自固恥污于僞如青衣之不賓公孫述牂牁之不臣於李特者類有之矣嗚呼一定而不易者地形也難保而易變者人心也故地形惟所守而人心惟所化苟知所守則力約而功倍圉固而敵畏苟知所化則囂傲革爲勇毅柔脆易爲信順不知所守則嬴氏家函谷而滅田宗國東海而亡矣不知所化則暴悍踵起於江漢姦醜接跡于

洙泗矣魚復與劍閣捋嶮角壯並爲西南鎮昔有銘劍閣者獨此缺諸江出岷山行二千里合蜀眾流畢出瞿唐之口山竦而巖萃水激而奔迅天下瓌偉絕特之觀至是殫矣是宜有銘琢刻磐石以侈寡匹以厲罔極其詞曰
惟梁州域神禹所別有歸其闡險肇天設控引荆襄枕倚牂越岡聯嶺屬崕岈巖薛洪流下瞰澎滲蕩瀟衡潛抗高華岱媿桀上柱天

倪旁扼日轄惟所屏障則恃于峽如戶斯闢
此爲之闐寇來是扞兵勢攸接鏡考前古棋
勢輻列水攻陸擊崖披谷抉犀甲燿爛白刃
鎗齧雲舸倏馳羽燾斯揭山奔羆兕壑瀆螭
蛻水姦脫入熟睨旋竊虐環千里炖人于鑣
曾不逾時宗隕祚拔四方之人王化所達甯
甘嗜亂實守攸脅豈富是怙忍上之缺惟此
山川重阻複疊德守者固兵據者蹶惟此黔
庶嶷嶷業業力制則離道懷乃協皇帝聖武

恩被猺獠國有至仁九土臣妾勒銘山阿永
彰宋烈

八陣圖記

劉

昉
州知軍夔

魚復陣磧剗自武侯江流莫移若有神護雖
經毀改幾失其真稽之圖經訪諸故老而遺
跡尙隱然可見也顧將湮沒余心是悼亟令
軍士哀石增累復還其舊方圓曲直縱橫廣
狹之不敢稍加損焉尙慮他時復罹前厄刊
圖於石用示後人界垣之內縮而計之以丈

爲分其外圖山川城郭之勢而不計以度且命作武侯祠於城上以俯臨之夔人歲以人日傾城徙市縱遊八陣之間謂之踏磧是役告成適當是日賓僚咸集酌酒陳詩以落之昔侯嘗擒孟獲觀營陣心不服曰若祇如是固易勝耳迨至七擒七縱然後以爲天威及司馬仲達觀其軍壘則嘆服曰天下奇才也桓溫過此雖能知其爲常山之蛇勢蓋未究其妙然能知與否在孔明初何損益余非能

知之者姑修故壘以俟來哲云

八陣圖說

范蓀

夔州八陣之磧聞天下歷千有餘年至今存於峽口之江浦往時每過其下惑於傳聞眩於目擊終莫得其說今蒙恩從宦於此始得以暇日登崇臺而縱觀之臺高而磧平累石粲然一一數之而無差於是推尋其意而爲之說曰陣法之大要方圓奇正而已爾武侯之法前爲八者八皆東嚮其勢直而方後爲

十二者二皆南北嚮其勢曲而圓方者所以爲正也圓者所以爲奇也夫奇者正之餘李靖所論握奇文是也方圓相生奇正相掄而陣法無餘事矣然則前爲八者八後爲十二者二何也曰此分數之法皆以八計之是以爲八陣也前爲八者八總而計之爲八八六十四後爲十二者二總而計之爲三八二十四凡爲八者十一絕長補短而三分之以其二爲正而以一爲奇合爲八八矣古八陣之

法其別凡八李筌陰符經以爲常山之勢者是也武侯之法爲陣者一而已非古八陣也然而爲常山之勢者固自若桓温之言近之矣若武侯之所以爲八者未知温能悉之否也五人爲伍五伍爲兩萬二千五百人爲隊二百五十取三而以爲奇者古也武侯之法八八六十四爲正三八二十四爲奇是一取三焉以爲奇則精於古矣夫奇正也方圓也陰陽也一而已矣方者其陰圓者其陽

也前爲方者八八六十四後爲圓者三八二
十四絕長補短大概二陰而一陽其在易二
陰而一陽倍之四陰而二陽爲臨嗟乎武侯
之意倘取諸此乎古者用奇之法或取於中
或列於左右或伏於後處於中者李靖之握
奇是也列於左右者淮陰侯與楚戰垓下之
勢也伏於後則武侯之法司馬遷書言漢與
楚決勝垓下淮陰侯自以三十萬當之皇帝
在後孔將軍居左費將軍居右絳侯柴將軍

然武侯之法密矣

八陣圖考附

蜀志言孔明推演兵法作八陣圖咸得其要
今考武侯八陣圖凡四其在廣都之八陣鄉
者一百二十有八當頭陣法也在魚復永安
宮南江灘水上者六十有四方陣法也在沔
陽之高平舊壘者二百五十有六下營法也
在益州城東南隅棋盤市者亦云二百五十
有六今無其蹟

又曰八陣謂天地風雲龍虎鳥蛇八者是也
天取其覆地取其載風雲取其變化龍虎取
其動靜鳥蛇取其相應風生於地而虎從之
雲騰於天而龍從之鳥爲動物必翔於天蛇
爲蟄物必蟠於地蓋有同位相生之義焉

泮宮達泉銘

柳夢弼

水供滌濯飲食之用民不可一日無惟古信
州上倚山下瞰江最苦汲負淳熙癸卯冬大
著楊先生奉勅來領漕事慨然有激清志越

明年革鹽弊正銓曹平權酷所以措凋瘵之
民於安全之地者無不周且至猶以爲未也
知民艱於水思得良工相地脈開數井濟之
聞泮宮有智井濼治力必省乃命奉節令孫
必益董其役俄而及泉新轆轤具縵乍嘗試
濟歎寒冽芬甘甃其面屋其巔與其邦士民
爲永久莫大之利郡文學柳夢弼請名先生
曰學井非他比也名達爲宜蓋取孟子之說
四端若泉始達之義先生惠顧多士所以期

待者良不淺矣夢弼竊謂嘉量微物盤盂小
器猶昭德記功載在銘典矧因民所利與乾
道同不言之美達則兼善使斯民無不被堯
舜之澤可暗無一字以紹無窮乃爲銘曰
水哉似道日用叵無夔擁山椒雲頂鄜鄠頰
瞰蜀江汲負崎嶇無井歎杜無力詠蘇悠悠
何載泮宮鑿井水生其芹墻對惟杏青衿浴
德朋來造請飲顏一瓢慕黃萬頃谷鮒惟何
土石邇堙士困陸沈學以日新挈瓶爲知叩

戶求人逃想西江疇憫波臣關西夫子道猶
四瀆按轡志清恩波滲漉謂學有源不遠可
復試疏導之其達必速迺任茂宰俾浚其智
九軻倍深天一中寒面以玉甃圍以珠欄今
之孟子還取四端名之曰達言近指遠卽學
諸生盍亦自反志達而明其流渾渾辭達而
文其初有本下學上達素王是師兼善天下
在推所爲是聞非達亦宜審之愈汲愈新徑
達聖涯所謂達者先王之德已達達人欲其

同得一字袞袞要當默識勒名學宮與道無
極

東屯高齋記

陸游

少陵先生晚遊夔州愛其山川不忍去三徙
居皆名高齋質於其詩曰次水門者白帝城
之高齋也曰依藥餌者灤西之高齋也曰見
一川者東屯之高齋也故其詩又曰高齋非
一處予至夔數月弔先主之遺跡則白帝已
廢爲邱墟百有餘年自城郭府寺父老無知

其處者况所謂高齋乎灤西蓋今夔府治所
畫爲阡陌裂爲坊市高齋尤不可識獨屯有
李氏者居已數世上距少陵才三易主大歷
中故券猶存而高齋負山帶谿氣象良是李
氏業進士名襄因郡博士雍君大椿屬予記
之予太息曰少陵天下士也早遇明皇肅宗
官爵雖不尊顯而見知實深蓋嘗慨然以稷
卨自許及落魄巴蜀感漢昭烈諸葛丞相之
事屢見於詩頓挫悲壯反覆動人其規模志

意豈小哉然去國寢久諸公故人熟睨其窮
無肯出力比至夔客於柏中丞嚴明府之間
如九尺丈夫俛首居小屋下思一吐氣而不
可得予讀其詩至小臣議論絕老病客殊方
之句未嘗不流涕也嗟夫辭之悲乃至是乎
荆卿之歌阮嗣宗之哭不加於此矣少陵非
區區仕進者不勝愛君憂國之心思少出所
學佐天子興貞觀開元之治而身愈老命愈
大謬坎壈且死則其悲至此亦無足怪也今

李君初不踐通塞榮辱之機讀書絃歌忽焉
忘老無少陵之憂而有其高少陵家東屯不
浹歲而君數世居之使死者復生予未知少
陵自謂與君孰得失也若予者仕不能無媿
於義退又無地可耕是直有慕於李君爾故
樂於爲記

東屯少陵故居記

于

棗

通判

唐大曆中少陵先生自成都來夔門蓋東下
三峽道荆襄以向洛陽漸圖北歸始至暫寓

奉節縣志

卷三十六

藝文

十五

白帝旣而復遷灤西最後徙居東屯質之於
詩皆可考峽中多高山峻谷地少平曠獨東
屯距白帝五里而近稻田水畦延袤百頃前
帶清溪後枕崇岡樹林葱蒨氣象深秀稱高
人逸士之居少陵於是卜築焉厭囂塵而樂
幽勝蓋詩人所以爲吟咏風月之地夔州之
詩多至四百餘篇計一草一木盡入詩中矣
少陵旣出峽其地三易主近世始屬李氏少
陵手書之券猶在李子襄頗好事講求故蹟

復置高齋用涪翁名少陵詩意創大雅堂臨
溪又建草堂繪其像歷歲滋久屋且頽圯弗
治券亦爲有力者取去而前賢舊隱幾爲荆
榛之墟慶元三年春連帥閩中卬邱公漕使
蘇臺錢公暇日聯轡訪古歎高風之旣遠而
故居之弗葺無以致思賢尙德之意因李氏
子欲析居卬邱公捐金市之而歸諸官爲田
一十一畝有奇繚以短垣樹以嘉木齋與堂
之欹腐撓折者從而增葺之架爲憑軒闢爲

虛牖開新徑以直谿而東屯之景物深窈幽
邃與少陵寓居之日無異錢公又誇草堂創
爲重閣移置少陵像於其上凭欄一望則平
川之奇麗四山之環合若拱若揖與賓主相
領略蓋東屯至是遂爲夔州勝處嗟夫少陵
始進三賦明皇奇其才嘗召而欲用之故其
詩有主上頃見徵之句已而齟齬不偶流落
頓挫故其詩有青冥却垂翅之句少陵抱負
奇偉許身稷卨蓋欲少出所學以自見於世

而卒不遇憔悴奔走於羈旅之間可嘆也雖然少陵之詩號爲詩史豈獨取其格律之高句法之嚴蓋其忠義根於中而形於吟咏所謂一飯未嘗忘君者是以其鏗金振玉之作與騷雅並傳於無窮也少陵避地入蜀其寓居之處同谷有草堂浣花亦有草堂皆官自葺之有以見其勿翦勿伐之意獨東屯不然誠夔門缺典也夫地固以人重而物之興廢有時今帥漕二公獨能興四百年之遺址而

更新之明示好尚丕變雅俗實權輿於此則是役也豈徒爲遊觀設哉

重葺三峽堂記

宋肇

天下之險莫險於峽江峽江之險莫甚於瞿唐蓋兩川回薄崎嶇萬里綿跨西南諸彝繚繞牂牁越嶲夜郎烏蠻之水大小并吞南北向背始則就下爲汙流濕成浸漸至於縈迂回折逶迤澎湃其終也瀾漫浩瀚掀騰洶湧咸歸於江之峽口者實水之會夫萬山對立

萬頃一注故至此而艱難齟齬傾危險側也
余以元祐八年五月持節本道同使張塾家
父一日相與訪峽中古跡而得舊鎖江亭於
故城之南隅其巋然獨存者但頽垣廢址而
已因語夔守趙仲達平父旣廣昔構而又易
新名其曰三峽堂者西峽巫峽歸峽是也茲
堂爲巴東上游盡占峽江之勝然而一有登
臨觀覽則景色雲物逡巡而異是皆人情參
差不齊故使悲歡憂樂所得未嘗同也請試

言其所以方其椅檻憑欄四顧遠眺長江急
雨飄風怒號奔走轉石萬壑雷動驚湍駭浪
喧豕震掉蛟鰐蜿蜒神怪叱咤若馬陵伏弩
之射龐涓澁水決壅之擊龍沮此西游不得
意之客方且隕心喪魄失筇停杯愕然而嘆
也泊至瞬息之間一俯一仰雲烟變滅山川
發露草花纖濃炳若繪畫松石奇怪旁出雜
見巫峯高唐想像髣髴襄王恍然而若遇宋
玉斐然而成賦此西州行樂之士尙猶極目

縱觀促席暢飲歡然而笑也迨其灑灑春深
魚復漲綠風雨晦冥龍吟其下白鹽赤甲東
屯西瀼斷崖奔峭安流逆浪遠近因依左右
映帶則坐中能詩之流莫不擁鼻拄頰聳肩
側身浩然而歌也又有沙岸石磧名灘古渡
白帝武侯之遺跡永安八陣之故處荒烟野
草廢宮舊戍遠樹平蕪孤村別浦牧童漁父
棹歌牛唱深林巨谷重巖複嶺懸猿舞鶴飛
鳴坐嘯則席上多感之子有至搔首撫膺掩

袂沾裳泫然而泣也客有誚余曰子作三峽
堂記而有笑歌嘆泣之說子胡不忘是四者
而付之一醉彼醉者劉伶阮籍之徒皆所以
全其真而名後世者也子獨求異於數子乎
余曰有是哉今幸不從監河侯貸粟則吾將
以大江爲飲凡雨雪之朝風月之夕所謂登
臨觀覽行且無時而不往也亦不復問其憂
樂悲歡之所來一寓諸酒矣尙庶幾有以自
託於酩酊而厠迹二人之列也可矣客曰唯

唯元祐九年夔州路轉運判官宋肇記

宋中興聖德頌

石今在峽中壁上

趙不憚

運判

臣仰惟光堯壽聖憲天體道太上皇帝以聖神文武之資受天眷命光啟中興迨功成三紀思欲頤神冲粹與天地並其長久乃睿謨默運斷自宸衷親以洪圖授之主器今皇帝懇辭切至淵聽莫回欽奉慈謀嗣承慶祚聖繼聖明繼明盡道以事親厲精以爲治凡施仁發政皆得於問安侍膳之餘巍巍乎揖遜

之風孝治之美自唐虞以來未有盛於今日雖宏修茂烈國史載之與典謨並垂然歌頌德業著於金石爲千萬世不朽之傳亦臣子歸美報上之義詎敢以固陋辭臣謹拜手稽首而獻頌曰惟天昭昭佑我聖朝是生光堯溥博如天淵泉如淵帝德罔愆炎精中微民心曷歸惟帝是依應龍之翔於彼睢陽赤伏呈祥天命誕膺紹開中興大明昭升羣盜訖平六合塵清復振天聲不戰屈人四夷來賓

一視同仁大德好生善勝不爭措刑寢兵惟
民是憂和好乃修撫之以柔龜鼎既安巋然
石磐萬國重歡日奉慈甯盡孝盡倫四海儀
型宗廟爲羞歲事郊邱以承天休帝籍躬耕
百穀用成以供粢盛會通觀時首善京師王
化之基多士雲從於論鼓鐘於樂辟靡尙齒
尊賢賓禮高年爲天下先升彼孔堂褒贊煌
煌雲漢爲章細書六經刻之堅珉粲如日星
性天冲虛玩好則無惟詩與書用損持盈散

利薄征有孚惠心惻怛至誠庶獄哀矜罪疑
惟輕讜言如瀾容之以寬帝王所難夬決庭
揚去佞投荒斷之以剛外禦旣除邦風晏如
功成不居迺命臨軒以詔元元明聽朕言予
臨兆民三紀垂精未能頤神我謀允臧遜於
元良以養壽康惟時儲闡天挺英姿聖孝仁
慈其從東宮正位九重嗣我無窮神器巍巍
付託行缺朕心庶幾儲皇懇辭俯伏丹墀天
聽不移申命羣臣拱如北辰以朝搢紳勉紹

鴻圖大賚寰區歡聲載途端冕凝旒躬率公
侯問寢龍旌恭上鴻名輝光益新至矣尊親
養志承顏貢珍百蠻以式匪頒奉親之餘迺
及乘輿倫德同符明聖相因鴻度是尊其道
盡循總攬權綱治具畢張宵旰靡遑若時登
庸稷契夔龍同寅協恭臨遣乘軺詢於芻蕘
觀採風謠晉擢名卿賜對延英蕃宣列城親
閱貔貅修我戈矛克壯皇猷法令必行先甲
先庚信若權衡綜核勸懲廉善廉能庶績其

奉節縣志

卷三十六

藝文

二十二

凝自昔繼明尙克時忱莫如方今親授規模
揖遜都俞惟唐與虞三代以還青史班班求
之實艱惟我皇上聖謨洋洋於堯有光惟我
大君元德升聞協於放勳臣子之忠告厥成
功頌揚形容不於其文惟實之云歸美是勤
夔門之山斗星爭寒可磨可刊以媿於碑與
天爲期萬世仰之

左朝散郎夔州路轉運判官兼提舉學事臣

趙不悛撰

左朝奉郎潼川府路轉運判官兼提舉學事
臣趙公碩書

左朝散大夫直秘閣權發遣夔州軍州主管
學事兼管內勸農事充夔州路兵馬都鈐轄
兼主管本路安撫司公事臣王伯庠上石
乾道十年夏四月刻

怠字彙補音未詳人名宋宗室趙不怠字仁
仲字從百從心此碑刻從夔門石壁上側印
下來從百從心點畫多寡不同也龍龕手鑑

奉節縣志

卷三十六

藝文

二十三

作慝與憂同

忠武侯祠記

張震

漢昭烈以區區一隅當天下三分之二恃有
忠武侯而已自操敗赤壁昭烈始收江南以
侯督陵零桂陽長沙三郡及昭烈入蜀侯鎮
荊州率張飛趙雲泝江而上與昭烈會以成
平蜀之功其後永安受遺歲在往返則瞿唐
控扼經營之地侯豈特有意於此哉今八陣
故基不沒於波流而卧龍屯營迺不復見按

晉永平中卧龍始以山名唐夔州治白帝侯廟在西郊杜少陵所謂卧龍無首對江濱者也不知自何時併爲寺寺故有祠又不知自何時已失之矣侯平生所眷眷者神物且知護之顧人獨不然予是以有感焉蓋天下之才不乏其卓然特立於功名之會固有之矣至責以大人之事則凜然如恐不及惟所志狹所施陋也三國鼎立爭天下漢號最弱昭烈戰每不勝而四海之義皆歸之吳孫氏以

江東伯人材視漢魏爲多其取江陵破猊亭功最俊偉然知摧其與而忘用之敵謀蜀則巧謀魏何拙也關公在荊州攻曹仁於樊操議徙都避之此何與吳事而權甯屈於魏請取關公自效乎彼其志不在天下明矣昭烈以關公故用師於吳兵敗身困摧沮以死蜀之君臣父子仇吳當益甚而置若不問此豈愬然真忘吳者哉顧所仇者大耳魏窺神器而竊取之其罪與吳孰重使蜀日夜唯吳是

圖則魏偷得自安或者持刺虎之術乘吳後是代魏受禍也嗚呼侯經營天下之略其規模意度與吳相絕如此耶世徒知周瑜呂蒙陸遜破三大敵功在當世鮮儷而侯不過拒司馬懿渭上而止其烈若少貶焉然百世而下望其品以爲三代人物者唯侯實當之數君子蓋不與也此所謂大人之事豈勉強用力所能致乎三國距今尙千載其事之成敗得失人類能言之而吳人於數君後未始有

奉節縣志

卷三十六

藝文

二十五

奉嘗者侯於蜀迺特厚蓋自當時固有巷祭野祀矣朝議以禮不聽卒不能禁迺聽立廟沔陽其傳至今夔州豈獨忘之侯故第在成都像設甚偉望之儼然猶可想見風烈予始命卧龍寺僧慧璉爲侯創祠且繪其像以慰國人之思而紀其大略使復有文仲子者觀之當以予言爲然

新修武侯祠堂記

王十朋

州知軍夔

益與夔皆祠諸葛丞相並見於杜少陵詩錦

官城外柏森森者益也卧龍無首對江濱者夔也夔故永安縣據三峽上流水有瞿唐灩澦山有赤甲白鹽形勝顯天下丞相昔與先主屯兵講武控扼吳魏經營中原之所有八陣圖永安宮卧龍遺蹟在焉祀而廟食宜矣然祠在州之南隅地非爽塏巷無喬木堂廡庠丹青剝祀事弗嚴無異蟲蛇穿畫壁時僅免無首而已吁可嘆也前帥紫微舍人張公震常立新祠於卧龍命緇徒奉之而城中之

祠未暇修豈留以有待耶乾道改元某被命自番易夔時方丐祠甚力俄一夕夢觀八陣豈丞相精誠默有以告之耶十一月至郡首謁祠下誄之以文曰丞相忠武蜀之伊呂高卧南陽悲咏梁甫草廬之中三顧先主將漢是興非劉曷與君臣魚水蛟龍雲雨才十曹丕志小寰宇假令毋死師一再舉吳魏可吞禮樂可許甯使英雄墮淚今古將略非長庸史之語因命工葺之廟貌一新闢路植木榜

其坊曰卧龍明年二月辛卯告成率同僚祀之嗚呼公之生也能使其君委國托孤而不疑其歿也能使洶湧江流不轉千載之石然遺像缺落未嘗一出禍福以警動之益足以見其聰明正直不顯其靈於土木偶以求人之敬畏殆非柳之羅池比也今夔之二祠相繼鼎新郡人四時香火牲牢酒體之奉有加而不怠盛德百世之祀益章可以一洗江瀆異代之恥無愧乎錦城矣於是乎書

奉節縣志

卷三十六

藝文

二十七

移建武侯祠記

王十朋

武侯故祠在州之南門沿城而西三十六步無斷碑遺刻以考其歲月之始見於圖經者略焉州在隋唐時治白帝史載少陵詩曰西郊諸葛廟者其地於茲乎十朋蒞任之初謁焉徘徊四顧敬想風烈歎廟貌之弗稱它事未遑也首葺而新之且書其事於石然地卑巷隘混以民居汙渠糞壤溷乎其間臭穢之所蒸蝸蟻之所家非所以妥靈而崇祀也門

之東去祠一百八十五步有臺下臨八陣圖
登臺而望則常山之蛇四頭八尾之勢宛然
在目北直郡倉倉故永安宮也據爽塏狀如
屏宮之北有水曰清瀼瀼出乎兩山之間東
入於江又東過灩澦入於峽峽口有山卓然
立乎羣峯之外者白鹽也可謂江山之勝矣
侯昔經營天下於平沙之上輸忠盡誠受遺
立孤今及千年陵谷雖變精神不亡祠於兩
山之間亦侯之志也遂與同僚謀而遷焉地

初爲節度推官宅徙於它所因其址築而高
之用其材斲而新之爲堂五楹庶萬椽南門
於臺又門於西通往來之道像仍其舊新厥
丹青冕服用侯又塑關張像翼於左右以諸
作者詩文次之乾道三年四月壬午告成詩
以祀之詞曰白鹽峙天兮灩澦屹江風雲慘
淡兮翱翔卧龍龍千秋兮何之新廟貌兮江
之湄前八陣兮後故宮龍兮龍兮神其中望
昭烈兮隔清瀼遺廟存兮交精神於恍惚駕

虛兮雲爲馭臣東朝兮主西顧魚得水而相
忘兮事無今古儼關張於左右兮一龍二虎
祠有新故兮侯無輕重舍其故而新是卜兮
邦人之情祠舍於圖兮自今始祀事不絕兮
有如此水

重修相公橋記

橋在夔城西門外

明 郭 棐

知府

萊國寇忠愍公有宋一代賢相也方弱冠時
令巴東爲詩云野水無人渡孤舟盡日橫識
者知其必大用巴東舊爲夔屬以故公嘗止

奉節縣志

卷三十六

藝文

二十九

於夔愛茲溪水清冽汲以烹茗後人因目其
溪爲相公溪建橋其上名相公橋竊謂公愛
茲溪之水豈逐物哉其中必有豁然相契者
其契之也深故其愛之也至蓋一機相爲感
孚而茲溪與公均有不得而與焉者予嘗觀
夫溪矣澄澈甘冽纖塵弗滓其清有足愛焉
源出西山蜿蜒入於瞿唐觸灩澦滙荆沔順
注於湖湘崩騰湍激百折必東其直而壯有
足愛焉其潤下之性生於天一發於蒙而利

涉於需凡夔民物胥爲涵育又與萬物一體之學相肖類則公之愛之也固宜又嘗觀夫公介特之操不染物累官居鼎鼎宅無樓臺有得乎水之清立朝風節磊落傑特至今凜然猶有生氣眇視丁謂王欽若輩不啻浮澌激漩有得乎水之直而壯至於澶淵之役奠宗社於磐石拯億萬生靈厯衽席之安澤物之功又奚讓於三川之汪洋浩大則其味而愛之也尤宜噫公以茲心愛茲水數千百年

奉節縣志

卷三十六

藝文

三十

後人以名厥溪橋又建坊表之是不可見此心此理之翕然大同哉予來守夔仰止高躅坊與橋塌圯弗脩慨然嘆息爰出餼廩之餘葺坊而新焉復卽橋繕砌之加以石欄用垂永久其鑿石鳩工則奉雲萬三邑令與有勞云

三賢祠

朱廷立 巡按

嘉靖壬辰夔州之牧若士請於僊居張子臨安李子曰維濂溪周公在昔判夔維梅溪王

公在昔守夔維潛溪宋公在昔觀化於夔三賢者倡道覺後勅治庇民遺軌在焉夫人思之樹祠以祀實在監司於是張子李子如其請議以公楮給祠費適予來按蜀放於夔遂以牘呈且曰襄是舉也實在臺史余是其議乃相與按志求故實得濂溪蓮花池於其上卜址焉越月而於門於堂於寢於垣咸備定名曰三賢祠使夔之牧若士歲時祀焉復詔之曰若知著誠去僞之道乎夫三賢者之植

德也盡吾誠也非曰欲人之與我也三賢往矣而人之祀之盡吾誠也非曰欲人之德我也今之吏吾惑焉薄實而厚名後施而先報是三賢之罪人也今之民吾亦惑焉見勢而附見利而趨懸碣者其詞誣貌象者具禮虛是若等者之所喜而亦三賢之所罪也故不旋踵而其跡泯泯不可復尋而顧可以僞爲哉茲若之爲是也誠矣達之以懋其學以善其政以無忝前人之休實在牧與夔之人吾

數人者不與也眾曰諾尋方生來渝請記遂
記之

瞿唐峽記

明 王嘉言 同知

峽者何取以山夾水而爲名也楚蜀之交以
峽稱者多矣而三峽爲險三者何歸峽巫峽
瞿唐峽三峽同稱險矣瞿唐爲最舊所謂西
陵峽者是也峽在城東十二里兩岸對峙中
貫大江蓋全蜀之門戶峽口石盤上樹鐵柱
二根山畔崖穴中有鐵索七條柱高六尺四

奉節縣志

卷三十六

藝文

三十二

寸索長二百七十七丈五尺蓋昔人置以截
江者柱於夏秋水泛則汨冬春復見嗚呼奇
哉夫瞿唐之險冠於諸峽者何蓋西南萬水
總注於斯而雙崖扼束極爲狹隘以故滌洄
曲折齟齬艱難驚濤奔浪喧豨匉匉歸舸行
牒一遭風動則上下失勢而此生安危盡付
之撇漩觸石瞬息間矣雖然關門一守百二
之勢也明初以湯廖兩將軍絕人之智力席
皇祖之神威師薄關下矢石一交而卽卻非

穎國階文之捷水陸夾進以奇取勝亦難爲力矣今天下熙熙氛沴久消雄關險峽雖依然索柱之存而山川勝概祇爲文儒嬉眺浪吟之具而已嗟夫宗國之憂雖非恤緯者所宜憂而處堂之樂達者亦恆笑夫燕雀之愚則防禦之略亦可於熙恬中講求之

白帝城三功祠記

林俊

正德庚午予起征藍賊道夔之下關所謂白帝城者問其祠公孫述也予曰越矣哉非鬼

奉節縣志

卷三十六

藝文

三十三

之祭也古者稱功制祀以爲國典無謂加典爲非宜况賊而神祀之倒持綱常蔑名教乃爾可慨矣方述起成都以輔漢爲名乘亂稱帝馬伏波見而少之曰子陽井底蛙耳故不受僞命專意東方用能佐世祖立功異域爲中興名臣而述竟終爲漢賊以死述可祠他日鄢藍亦可祀亂賊之臣亦何憚而自沮耶嗚呼世道之大關也政教之攸繫也淫祠之當毀其有先於此者乎嘗怪述生盜名器旣

誅死猶土偶南面謬竊血食者千數百年少陵東坡徒寄春秋之筆而諸葛武侯張忠定范忠宣輩任是方猶未及更正意者將有待於今耶任世道者之責也既命毀其像易其額爲正典所宜祀者土神江神而伏波亦與焉昔共工氏之伯九有也其子后土氏能平九土故祀以爲社書曰宜於冢土下關雖一里之社土之民其世依以生也川澤以出財用而祝融元冥河伯江瀆俱載祀典潞公所

修益州江瀆之祠固在也書曰望於山川下關又江之襟喉民寄命至要也皆蒙被功德所宜報而祀而以告以祈又胥聚於此也若乃炎精中微奸僞移柄當是時述能如援擇漢胄以自依則述將與賈鄧等伍望蜀之萌何自起蜀之赤子何名爲從賊浮橋覆溺火燒之慘亦何因而至哉述名教罪人貽蜀人之禍至於今爲烈也故毀述而進伏波與順也亦正祀典也嗚呼君臣天地之大經也亂

臣賊子人人得而誅之無赦者况予叨膺討賊之權者乎植人心扶世教毀賊述之祀以聲討藍之端道之大關若此孰謂不然乎哉

〔按〕廷瑞營山人正德三年與湖廣崔蓬頭及大甯竈丁鄆本恕廖麻子等聚眾圍大甯縣令李陸斬蓬頭廷瑞率餘黨攻巴縣尋劫營山攻巴州維時川北分巡道王源追至儀隴戰敗死之賊勢益橫至蒼溪川東分巡道馮傑與賊大戰於鐵山關戰敗又死之時林俊

奉節縣志

卷三十六

藝文

三十五

在家庭起爲巡撫俊見賊勢猖獗單騎入營諭以順逆賊望見公皆驚服叩首羅拜稍爲斂跡旣而總制洪鍾邀殺廷瑞本恕等賊散林俊致仕去廖麻子復屠劍門陷利川梁山等處總督彭澤討之擒廖麻子餘黨悉平

義正祠碑記

張

儉

按察司副使

嘉靖壬辰之秋予與瀘濱子竣事於夔放舟中流由魚復八陣圖歷卧龍岡永安宮東抵灑潁鐵柱登孟良之梯誦蘇子之賦出固陵

轉鬼錯路駐白帝城左拱赤甲面揖白鹽俯瞰瞿唐之洶湧遠望陽臺之逶迤而凡東屯石鼓草堂十二峯莫不爭奇獻秀效伎於指顧之下蓋充然若有得也予顧謂瀘濱子曰山川之阻歷代之興亡以之斯固蜀之門戶也由今而弔古緣跡以考心百世之英雄能遁情於我邪悲夫子之不遇武侯也瀘濱子曰茲實武侯用武之地峽有瞿唐關有鬼門殆天險不可升歟予曰武侯佐先主經營中

原屯兵於此以控吳魏血食而廟祀其誰曰不然問守者曰此何祠曰古白帝廟公孫述祠也正德庚午總制林公徹其像爲三公祠以祀土神江神馬伏波之神雄文炳炳在石可考也時有槩木因問曰誰所爲曰僧淨柱奚所構曰作觀音閣予嘆曰殆造物留以屬予二人者邪乃詔僧激以大義僧曰唯命迺以白於大巡兩厓朱公曰可遂因其材度其規制予二人者佐其費以委千戶王鳳董其

役堂廡門垣不踰時而告成榜曰義正益巍然煥然成一方之大觀而全蜀增重矣嗚呼述以漢賊竊南面於土偶者千餘年至總制林公始克黜觀音閣之材苟完矣不遇兩厓公安能成今日明良殿之便耶夫物出固有數也而因時制宜不各有所遇耶雖然古者監司代朝廷宣導風化條舉紀綱黜邪崇正擿奸佑仁興廢振墜非直所以肅百吏將以植人心而扶世教也茲祠也一變於三功再

奉節縣志

卷三十六

藝文

三十七

變於明良使東巴西蜀之民曉然知邪正之辨君臣之分則趣向一而好惡明爲臣盡忠爲子盡孝必無崇虛無而黨亂賊者矣不又將有大裨於世教耶予於是又幸茲祠之可久也維時倪守組同知楊純推官陳瀛指揮曹玉知縣胡文光咸預其議實相與共成之
建立火神祠記
蕭騰鳳

夔郡多火災民病甚太守東亭李公至思爲民福地則立廟祀火神東置天門坊取水勝

火之義北濬萬年馬蝗二泉度城入井以省
江汲以澤燥剛火遂不爲災民有甯宇值歲
熟入廟報事者相踵夫反風滅火史稱異政
公以至誠感神坎離旣濟火患永熄勒石其
宜公名宜春東郡人也登戊辰第由司徒中
郎出守夔門云

重修灤西草堂記

陳文燭

昔人謂杜子美夔州以後諸詩蓋最工考先
生自成都下瞿唐浮湘望洛而寓於夔門其

奉節縣志

卷三十六

藝文

三十八

居三徙有灤東有東屯而灤西尤著地多平
曠田可水稻先生出峽卽易其主而所手書
券宋元間得而珍之後日荒圯萬厯改元夔
守郭君棐訪遺基檄奉節令羅繡藻新祠事
肖先生像太守能文章有記述而又請余碑
焉余奉天子璽書宣教化例得旌揚古今忠
義之士徘徊祠下不覺泫然也憶先生獻三
大禮賦上大奇之命宰相試其文拜左拾遺
乃高自稱道先世以來多以文顯若薄楊馬

而不爲者其矜誕一時有祖審言之風會祿
山亂輦轂入蜀避走三川肅宗立往投房琯
至不省錄嚴武節度劍南復依焉表爲參謀
檢校工部員外郎先生久於夔及茲堂之建
其實有足悲者而史稱先生挺節不污所爲
詩歌善陳時事千彙萬狀兼而有之忠君憂
國每飯不忘當時韓愈氏高其文章謂光焰
長萬丈眞知言矣語曰生無一日歡死有萬
世名先生之謂乎先生襄陽人與孟浩然友

奉節縣志

卷三十六

藝文

三十九

善襄舊有孟亭不存而峴山祠先生者亦荒
今灤西更新比於同谷浣花可謂無關世教
乎余爲迎神送神曲使歌以祀其詞曰

昔飄零兮流寓嘆遷次兮朝暮側身來
兮參差其舊路

右迎神曲

三年飽兮煙霧千載驚兮香炷尙轉蓬
兮山靈其呵護

右送神曲

奉節縣復學碑記

國朝周燦學政

奉節爲夔府附郭又大甯歸并之邑也前明弘治裁邑學附郡迄今幾二百餘年我

皇清定鼎以來生聚教訓人文漸興康熙二十四年巡撫韓士奇請於朝設訓導一員會前任兩學使一以報滿一以宅憂皆未及考故數年來雖司鐸有人實無一士可教余丁卯仲夏甫視事隨據郡邑申詳于巡撫姚締虞轉令照例錄取咨明禮部隨准部查從前建廢

奉節縣志

卷三十六

藝文

四十

年月及取進額數余復請於護撫藩臺李輝祖逐一咨覆嗣准部議謂曾設有教員並未題明復學應無庸議此康熙二十七年十二月間事也時新撫中丞噶爾圖節鉞初臨檢閱全牘慨然嘆曰官無士訓其虛設乎命出於朝可竟已乎復檄藩司與余詳議具覆遂會同督憲司馬葛合疏上請後奉

諭旨準行此今春二月間事也秋七月余按試夔東通前科歲兩試取進文武童生凡四十有

五人環余而拜曰我奉邑從勝國時有邑無學與無邑同既蒙復學而未准錄士與無學同生等得備弟子員實自公今日始請志顛末以示厥後余曰此

聖天子崇文鉅典也余嘗出使南交見雕題鑿齒之儔莫不被服

聖教近琉球國且遣子弟入大學讀書同文之盛亘古未見况爾蜀文獻名邦奉爲夔東首邑豈終置之膜外乎然非上憲愛育人才一片

奉節縣志

卷三十六

藝文

四十一

諄誠瀝疏上告亦猝難動

九重之聽耳奉今日之無學而有學主持者大中丞左右者方伯詳請者郡邑余第奉行之樂觀厥成而已抑於此竊有懼焉爾諸生自今以往念

朝廷特恩上憲德意競自砥礪或耑志於詩書或研精於韜略異日師師濟濟爲

國家腹心干城之用余亦與有榮施焉不然徒博一青衿誇耀閭里日居月諸碌碌以老是

有學而無異於無學諸生負余教誨余則負朝廷與列憲一番盛舉是又於所厚望於諸生者也尙其勉之哉

重脩奉節縣學文廟碑記

趙鍾嶠

奉節在前明先有學後無學在

國初先復學後分學士之遊庠者悉附府學學靡常學宮因以不建蓋興墜之故人才人力係焉未可強也乾隆間有長白李公景諄守斯郡慨然創

奉節縣志

卷三十六

藝文

四十二

聖廟於治東北隅規模草草至嘉慶初中州周郡伯景福來始捐多金鳩匠圖新甚盛舉也惜都人士集腋力棉事半舉而公去公去矣奚望乎北平蔡邑侯者狷介人也滯茲土十一載平時好激勵人才歷科多膺選舉者今春詡然奮力輸財先以二千金修府巒序旋瀝清俸遴正士舉茲廟之未完者次第完之計增大成門三楹配饗祠各一楹櫺星門一座上下階礪二百餘丈其他若龕若楔若垣墉

若彝器悉符典制偉矣備矣隸茲學者樂觀厥成矣嘗慨天下事圖始靡難圖終爲難是役也不擾民不動眾一肩獨仔可謂爲所難爲行見人才之興卽由人力而起多士其有幸乎哉是不可以不記

白帝城重脩昭烈殿記

蔡毓榮

川湖總督

巴蜀之險夔爲首夔故治白帝蜀漢改永安先主伐吳還蹕托孤武侯之地也考舊志白帝城昭烈帝武侯關張皆各有廟隋唐無碑

奉節縣志

卷三十六

藝文

四十三

碣可稽在宋張震王十朋已謂武侯廟在西郊杜陵詩所謂卧龍無首對江濱者不知何時爲寺故有悽然香火依僧之感後又移武侯祠置他所以關張翼其側今又不知何時與昭烈廟復合爲一兵燹以來殿宇頽圮像設僅存風雨摧剝余持節入川經過其地瞻拜歔歔捐資首倡藩臬郡縣各勸助鳩工庀材葺而新之中構大殿上祀昭烈南面弁冕東列諸葛武侯西列關壯繆張桓侯相左右

焉前構拜殿旁置兩廡肇工於三月之吉落成於九月中事竣有司請余顏額併泐其儷牲之石余訊舊額綽楔曰漢代明良遂不復易因泚筆以紀歲月悉記同事姓名如左而不能不致慨於昭烈君臣之際也當三國鼎峙時阿瞞虎踞中原仲謀鷹揚江左謀臣猛士如雲如雨昭烈百戰之餘屢遭踣躓翱翔翻飛卒成帝業者獨恃一龍二虎爲之羽翼耳諸葛明於治國而爲相關張勇冠三軍而

爲將當時止稱將相材而余謂昭烈君臣微獨岸視三國要非三代以下所能並駕比肩者也武侯氣象規模伯仲伊呂出師二表彷彿伊訓說命陳壽不公之論崔浩責備之詞烏足窺其涯際壯繆義炳春秋光爭日月桓侯以死拒敵皆王臣蹇蹇不有其躬而昭烈於關張義則君臣恩同生死隆中三顧與莘野之聘後車之載先後一轍彌留數語顧命元臣心神不二先儒以爲君臣之極致古今

之盛軌表曰元良亶其然哉余獨惜昭烈以
雄才屈於天命使王業偏安不得與高光諸
帝共列三十六陵之內並載祀典誠千古一
大憾事然而君臣祭祀歲時伏臘走村翁者
千百年如一日也非聰明睿智神武不殺者
其孰能當之若關武安王久錫帝號威鎮六
合張桓侯亦封忠顯王而今皆仍舊號者君
前臣名義統於尊也

杜工部祠碑記

江

權知府

奉節縣志

卷三十六

藝文

四十五

工部入蜀所居皆名草堂惟夔之草堂有三
一曰瀼西一曰瀼東一曰東屯瀼西由魚復
入江瀼東由西陵入江蓋唐時治城與白帝
相唇齒魚復在其西西陵在其東故以此指
而名之若今時郡治則前所稱西瀼亦在郭
之東矣然西瀼源近而流淺夏秋水漲可通
小舟餘時則涸兩岸又皆懸崖仄徑無可容
十笏者諺以此爲草堂故處豈山川今昔易
形歟抑流俗傳聞失實歟東瀼爲公孫述屯

田之所源遠而流長兩岸多衍迤平坦工部
卜築於斯自可無疑前人謂灤西平曠田可
水耕蓋誤以東灤爲西灤耳工部出峽後東
屯三易其主宋時帥斯土者以金購之爲葺
草堂祠以祀世遠年湮無復有踵而修之者
近人於舊城西偏築數椽爲草堂謂卽工部
詩中稱草閣者然湫隘卑陋不足觀且日久
傾圮嗟乎工部文章光燄萬丈上接騷雅下
啟百代後人以詩史目之夷考其時身丁安

史之亂京國淪沒乘輿播遷不能扈從行在
放逐西奔流離入蜀棲遲幕府游歷諸州至
於輾轉思歸留滯於夔亦足悲矣然身經喪
亂播越於外忠君愛國之念每飯不忘舉凡
耳目所經可憂可愕可歌可泣之事無一不
隲而寓之於詩故其詩憂時嘆世於小雅之
怨誹離騷之哀怨纏綿悱惻笙磬同音所以
流傳不朽非僅以文詞之工也今讀其詩忠
愛溢於言表惟入夔以後爲多然則夔爲工

部嘯歌之地千百世神之所棲而於其所居止不能復尋故迹又無以爲春秋妥侑之地其何以俾夔之人士趨拜於庭思慕不輟而天下後世聞之知夫轍迹所經流寓所在地以人傳遂堪不朽人生以大節爲重遭際殊時君臣則一油然而生其忠愛之心也乎嗚呼尹茲土者不得辭其責矣余蒞夔期月吏民相習政簡刑清乃於簿牒之餘尋草堂而不得得晉階書院舊址別購詩堂雖非當時

故絳所存而介在東西兩瀼之間知亦爲工部之神之所降格也地去城郭遠於書院爲非宜前太守李潛夫已移而建之郭內故此得購爲工部專祠云

按杜詩工部在夔寓居之處凡五曰西閣曰白帝曰赤甲曰東屯曰瀼西西閣在城內唐夔州城在瞿唐關與白帝城相連西閣正對瀼瀼堆工部詩所謂次水門及宿江邊閣皆指此今關廟沱有明通判何宇度之碑題云

唐杜工部子美遊寓處是殆西閣舊址歟赤甲不知其地大約與東屯相近在赤甲山下或曰卽白帝也以華陽國志考之古時名赤甲城公孫述始改名白帝城東屯在下關城之東草塘河之上草塘河俗名東灤水兩岸多稻田昔公孫述屯田於此故名東屯杜工部所買田產及所營高齋俱在此今東屯工部祠猶存灤西者西灤水之西卽今州治灤西草堂一名北園有果園四十畝工部去

奉節縣志

卷三十六

藝文

四十八

蜀以送友南卿其地之平曠可知宋以後移治灤西草堂舊址改爲漕司署矣唐宋人碑記可考工部并無灤東草堂之名也

重修相公橋記

蔡毓榮

知府

古之正人君子名鄉賢宦不獨其枌榆故地甘棠遺跡後之人指爲珂里愛其嘉樹追憶不忘雖其偶然憩跡遊覽晏息之所皆欲述而志之以比於雪泥鴻爪貞岷峴石之不可得而磨滅焉宋寇萊公人品事業彪炳國史

其發軔濫觴始自巴東令今世所稱萊公柏者乃公太平興國年間宦遊故蹟也公是時賦詩云野水無人渡孤舟空自橫人以是卜公相業云公愛夔州山水間以公暇徜徉寄傲酌溪水烹茗後人遂建橋溪上名相公橋明萬厯間太守郭棐建石闌復置相公坊爲文以記之文經獻賊毀裂不復存而石闌舊址尙在余檄夔守召匠整治因紀其事以見公之所在繫人思在公安爲竹在巴東爲柏

奉節縣志

卷三十六

藝文

四十九

而在夔爲橋有如此

重修古利民池記

汪志敏

古利民池嘉靖太守張公諱廷柏開濬瀦水以鎮山形峭削和燮夔地剛燥之氣消火患利濟民生者也歲久淤塞遂成平地不復有池余佐治永安十有餘載奉使公出之日居多參贊郡事之時甚少每見祝融示警兵役搶救雖有官民飲水數椀涓涓細流迅速急需每不足以遏其炎炎之勢取汲於江道遠

莫濟均不能隨時撲滅延燒廬舍慘目傷心
欲追張公遺績又苦俸廉涼薄力獨難勝爰
命奉節縣尉屬利民池附近所居紳士耆民
有願共勸斯舉者咸聽樂輸不數日而雲集
響應工竣池成因勒石池畔誌其所以修築
疏濬並諸人與事之力皆得鐫列姓名俾後
之君子臨池覩石知此池乃前張公遺愛紳
士耆民共勸厥舉者直敘其事以爲之記

便民規井制產記

杜

樞 知府

乾隆庚申之秋余自敘永攝夔篆下車後見
城中居民皆趨汲於江路甚遠凡烹飲澣濯
之用富者買諸擔夫貧者及孤寡老疾者買
食與負汲均難於是遍詢父老知西山固有
源泉明太守張公廷柏許公宗鎰曾引注入
城以便民今久廢莫能興修余聞其言切而
盡爰相度引流由三道堰至開元寺進城凡
三里許捐養廉一百九十餘金購運竹石作
規泉達於井工竣而民稱便余卸事回任閱

八載戊辰秋又攝夔篆驗視硯井井無恙而
硯漸殘矣於是復詢父老曰竹石需補也看
守需人也其爲之計久長乎隨捐養廉一百
金置買奉邑龍姓渣口石田地收租十石歲
爲常以資費用並諸人交代焉惟是水利之
興實張許二公創之余因焉而已後之君子
經理責成亦因所利而利焉則井與產可便
民弗替矣是余之厚望也夫是余之厚望也
夫

奉節縣志

卷三十六

藝文

五十一

杜公井記

譚 譯

公陝西甯朔人也任永甯軍糧司馬志存利
濟政有惠聲乾隆五年秋攝太守篆於夔見
夔之戶口繁熙一井弗給思所以濟之訪治
西數里外舊有蒙泉可以引注城中慨捐俸
廉之半鑿石導淤甃井於利民池畔士民便
之昔杜預鎮襄陽修陂塘以灌民田民賴其
利謳歌弗諼今夔之人士食公之德而不能
忘所自有也因僉稱爲杜公井勒石以誌不

忘焉

貞女聞氏碑記

程紹洙

慨自餓死小事再醮全不知羞孀居改操重婚視以爲泛從未有守八十二年不字之貞白髮不愧結髮凜六十五載冰霜之操此心猶是初心如貞女聞氏之青白芳香者也氏祖籍江南故原任夔協左營守備聞昌之女生於順治七年十六歲許聘江甯府溧陽縣宋叔棟之子亦郊爲室未稼而亦郊病歿氏

奉節縣志

卷三十六

藝文

五十二

哭泣請於親迫欲往弔夫靈且願侍奉翁姑以全婦道時父已爲江南漕標千總憫氏苦心遂送往宋門氏盡哀盡禮葬夫畢遂不歸而織紵爲供奉翁姑如人子禮年二十翁歿氏竭力葬之年二十一姑歿氏又竭力葬之慟哉宋門旣無伯叔終鮮兄弟無可依倚仍歸母家隨父任來夔而淡泊自甘有大家貴族求爲婚者氏力拒之父母草能強聽其撫姪育甥氏俱盡心經營爲之完娶無何父因

譚逆之變以失守去官家於夔遂終於夔而氏之所撫者又或歿或亡或貧不能自給氏毫無怨悔惟種蔬自贍針黹營生而已夔城紳士悉其顛末亦曾合詞呈請旌表雖未蒙具題而歷任府縣當事俱有匾額旌揚文武官長憐其節孝亦間有月給薪米之惠又苦不能繼及年至八十有一益寒無以爲衣饑無以爲食氏仍處之晏然也於雍正七年夏至前一日偶染微恙氏本性光明自知數盡

着衣西向含笑而逝嗚呼氏青閨守節早已著美於南州白首完貞又復流芳於西蜀一塵不染品如玉而無瑕諸艱備嘗心匪石而莫轉然後知氏之奇窮奇苦以至於死正彼蒼欲彰氏之完貞於無虧也歿時幸荷前任邑侯暨兩學師同城紳士施棺施衾然殮而未葬至於今春破屋不足以蔽風雨恐致暴露爲此合郡士庶讌集躑躅樂助微資復鳴之當事始爲之卜葬立石請建坊表揚猗歟

休哉埋芳香於寸壤草木皆榮標青白於豐
碑山川俱秀庶幾望其墟者咸仰止之維殷
過其地者悉憑弔之不已此非敢效仗義揮
金之爲實樂伸秉懿好德之念云爾

雪堂詩序

爲傳作楫作

許汝霖

學政

蓋聞羈臣行役撫時多慷慨之詞烈士從戎
觸景有離憂之什吐壯心於尺素寫忠款於
寸丹是以聽隴上之禽聲因而洒涕見陌頭
之柳色輒以成吟自古皆然於今尤異傅子

奉節縣志

卷三十六

藝文

五十四

濟菴一代人豪兩川雋望文鋒清麗奪錦波
峨眉之華品格端凝挾紫電青霜之氣憶余
卯歲校士益州雖藻鑑空羣慚非永叔而英
雄入彀喜得南豐疑義當裁對短檠而商確
奇文共賞終午夜以雌黃事竣東歸道經西
灤濤飛千尺山過萬重則有連枝太守興訪
丹霞猶子元戎幽尋白帝高峯嘯傲彌日流
連君復攜厥酒樽餞於江滸共搜赤甲白鹽
之勝憑弔陣圖魚浦之踪觴詠盡歡倡酬交

作于胥樂矣何日忘之嗣是秉鐸芹宮繼卽
奏刀花縣時苦兵興之役羣憂飛輓之艱君
獨出庫藏以給軍需免追呼而蘇民瘁遂聲
馳於上國用表正乎南臺霜飛白簡之花露
上皂囊之草鼠狐屏息烏雀無喧特奉掄才
恩垂兩浙旋膺

簡擢威凜三樞頒宏議於正事之堂盡是巖廊謨
略鐫讜言於金石之錄皆成忠愛文章斯時
也過從無閒於晨昏來往兼多夫贈答要豈

奉節縣志

卷三十六

藝文

五十五

吟風弄月同詞客之掉頭配白儷青效詩人
之义手也歟顧乃貞如白璧忽遇緇塵直似
朱絲見嫌曲木余旣負薪河畔君亦漂梗邊
方共此羈懷能無浩歎於焉南冠琴韻悽涼
鐵嶺峯頭西陸蟬聲惕息銀州境內此蠻溪
椰暗深衛公過嶺之愁而小圃雀翔起蘇子
居黎之祝也邇因寇犯西陸自干薄伐君遂

書陳

北闕願効前驅維時公子王孫聞聲者願隨橐鞬

駝醕駱米接迹者爭饋壺漿紫塞曉風時寫
激昂之志黃沙秋月常攄忠憤之懷武侯轉
粟籌邊勳名卓絕王粲饒歌入塞氣度沉雄
乃蒙

溫旨以還鄉遂踐昔言而過舍出一編以相質輒
三復而興思回首曩時睠言此日不無菀枯
之異致而今昔之殊塗矣然而把盞劇談掀
髯共笑挑燈晤對披卷長吟又何減縱遊宴
於瞿唐極綢繆於京邸也哉因以綜其梗概

奉節縣志

卷三十六

藝文

五十六

序之簡端庶知弱翰書殘悉屬憫憂之意唾
壺缺盡終非愁苦之言云爾

郡司馬毛公書院記

傅作楫

江自岷山而東歷冉厖趨錦城循夔道過涪
陵奔騰紆折凡數千里而達於夔其間吐納
眾流涵負天地汪洋澎湃莫可制束而西陵
灑灑之下神輸鬼鑿綿亘七百餘里重巒複
岫幽峻險怪江流偪仄互相盪潏山川靈異
之氣於此遂一聚焉迤城而南爲武侯八陣

圖故址昔杜少陵於灤水東西誅茅卜宅吟
覽興衰寄懷今古茲地勝槩大可知矣有明
季世盜魁竊據瘡痍之民芟薙略盡自先大
夫掾十三營災黎於巫山罄家財殫心力滋
培教養延兩邑之民脈數十年來人材輩出
亦旣彬彬郁郁矣維是綺紈望族出有師儒
之親內無衣食之慮優游涵育玉女於成殊
易易耳若樞門寒酸徒欲啖字爲飽逞逞中
道廢置迄無成就非才之不逮所處之地異

也三韓毛公來佐是郡新猷敏妙人稱賢侯
覽茲勝區聿興書院當其慮材用程土物量
工力計徒傭實勞且瘁矣學廬旣成德造咸
集觀者驚嘆僉謂公之賢而夔士之幸予惟
廣輪之氣散於平原曠野而聚於名山大川
山之迴環高下川之漩湫鎖結皆地脉所融
貫也居是土者必有清英宿德才行高秀之
彥出爲邦家光卽寒膚嗛腹苟以翰墨爲勳
績則澡雪垢滓浮英華而湛道德亦如順傾

轉圓之易不然則終於褊陋頑頓而已公既
覘此意而反覆重望於夔之士且士之入其
室者絳紗請業無贏滕履屨之勞雞壇求友
有金聲玉色之助丹崖翠壁供吟嘯於目前
雪浪銀濤擴襟期於天外真可以俯仰千秋
遐觀萬里者矣由是而揚芳飛采增榮改價
矚然爲世法程他日問蜀士以爲有能通張
寬之七經講譙周之六籍者乎有能繼相如
之賦筆試揚雄之奇字者乎有能擅敬夫堯

奉節縣志

卷三十六

藝文

五十八

叟之學效景仁伯雨之忠擬子美子瞻之才
者乎必且爲之解曰古今人何遽不相及也
吾於夔之山川信之實於是舉期耳方今

聖天子湛恩汪濊覃被萬族羅天下多聞之士以
闡實學一時東筠西杞莫不蔚爲國華則今
之翱翔書院者俱儼然備廊廟之用公之裨
益於夔豈淺鮮哉公行矣青符畫軾移節潯
江潯之山川靈異不知較夔何如予固知公
之必以教夔者教潯也抑聞紫泉之水爲賢

守令及才人之應則公之隨地立教將皆必有合焉予夔人也誌公之德誠爲夔幸者公之化行于潯而潯之士又且德公當更有起而記之者也

重修潤澤池碑記

李仲良 知府

池所以瀦水也夔俗無井惟以竹引山泉蟠屈山腹間竟至有數百丈而及于池者夔人利之歷有年所杜詩云白帝城西萬竹蟠接筒引水喉不乾卽此謂也予下車伊始詢井

奉節縣志

卷三十六

藝文

五十九

養之義惟時後山引水諸筒日受風磨漸就剝裂爰從新更換節節相引一及利民池一及龍王池池有淤塞者復從而濬淘之以期竹能引水水能注池也於夔人不無小補焉茲奉節縣錢警齋大令復以東門潤澤池尙須修補爲予告查此池爲日已久道光三十年萬令次榆曾爲之修池四面甃以石石闌環之八年恩遇堂太守復濬深之民稱便焉凡此皆前之人分鶴俸以惠及夔人也迄今

又三十年矣池爲土偃幾與地平予爲夔人計因商諸錢警齋捐廉復修令任君慶堂董其事池周圍三十餘丈深二十餘丈用石層壘以期無滲洩且能供汲引以濟人時城工甫竣又以池中積土培補城根一舉兩得事莫有便于此者予適因奉諱南旋未竟其功若夫接竹引水以利民用予固有志未逮也請以俟同志之君子焉

增修石礮引水記

汪志敏

夔城地處山麓萬家無井民汲於江明嘉靖間張公廷柏許公宗鎰念民汲飲惟艱相度陰陽慮有火患乃興修石梘分引侯家嶺江家坪馬蝗溪翟家坪各水源注之各池爲思患預防計官民飲用均給焉兵燹後泉斷石竭盡皆淤沒至康熙戊戌太守胡公期恆重修江家坪馬蝗溪翟家坪昔年許公導泉以梘凡三一至夔協右營一至府廳兩衙一至郡城西北以供民用嗣歷任俱加修理因得

不廢恭逢

盛世生齒日繁一池之水不足以濟萬民之渴庚申秋杜公樞署篆甫下車眺望山川形勢曰莫非此地多火災何山形尖削如火字也山形似火當引水以制之余深佩前賢之不繆與今之見略同公於是捐廉率邑令鳩工庀材疏三岔谿之上源侯家嶺明太守張公引泉故道增添石規接流架竹聚鑄石另造一井在西門左側民飲於井者欣然色喜名曰

奉節縣志

卷三十六

藝文

六十一

杜公井惟是爾民勿驚一時之喜尙思永久保守庶可爲億萬斯年之利余閒曹力薄不敢徒負虛名泯人實行謹序其事以志不朽

奉節縣志卷三十六

文彙下

重修白帝寺碑

國朝 鮑 康 知府

粵攷創業之艱君臣魚水之盛惟漢昭烈爲最而諸葛武侯之忠勛卓越亦炳然與三代同風白帝城者實昭烈托孤之地武侯受命討賊之所經營也康嘗歷游燕趙齊豫秦晉最後乃至蜀所過通都大邑見夫古文人墨客一觴一詠之所必有人爲表而出之披荒

奉節縣志

卷三十六

藝文

六十二

棘樹豐碑不惜穿鑿附會以實其事而識者不相詬病者與其過而廢也甯過而存之耳矧白帝城之鏗震一時信而有徵顧聽日就荒蕪久之並遺址不可攷詎非守土者之羞哉城初建於公孫述後之郡卽基於此宋丁謂所遷之灤西而於高埠建屋並祀子陽昭烈謬矣明督師林公俊黜述以祀伏波于義近正而武侯之祀仍闕如弔古者終以爲憾後人更去伏波建明良殿取杜詩先主武侯

同閼宮之意士人復以地濱大江臨灑潁瞿
唐之險別肖諸佛暨江神象於其前揆之神
道設教之義亦復不悖方今

聖人御宇凡古帝王先賢陵墓祠廟飭以時修葺
達之工部歲暮具以

聞禮至渥也同治九年春康來守夔九月呂扉青
司馬權奉節事張濟堂通守約同登是城見
棟宇摧落心愀然時承大水後救災拯患之
弗暇且郡城內祠宇之就圯者不可勝計次

奉節縣志

卷三十六

藝文

六十三

年始捐資以次修復並北山之蓮花寺亦重
葺焉皆落成獨是祠未籌及者非敢緩也亦
其勢有難焉者茲祠距城十有餘里界高山
中一木一石悉費人力扉青蒞任伊始卽創
立少陵書院兼新其傍武侯祠康喜其同志
今年春以茲事相屬扉青毅然任之郡中諸
紳咸樂從康亟輸金以爲倡祠左仍肖諸佛
江神像後復爲明良殿其西偏添建三楹以
其中爲武侯寢殿山之下舊有文昌祠亦圯

於水乃遷之上其右則祀杜少陵李太白范
石湖陸放翁諸詩人更於隙地構長廊築危
亭一覽江山之勝與郡人士作小憇地其東
偏則爲禪室締方外交而白帝城自此改觀
矣諸君子亦可謂爲善最樂矣夏四月康解
組將行扉青約往觀適大雨勢將不果旋開
霽卽櫂小舟率從子恩綬往焉同人咸集歡
讌竟日見規制已大備雖不及待其成逆知
異日客子溯夔巫舟人指峻嶺茂林間游覽

奉節縣志

卷三十六

藝文

六十四

一郡之名勝兼知後來者亦必時加補葺踵
事增華俾廟事永永弗替不特慰扉青興廢
舉墜之本意而康亦藉以大慰也夫

勅建節孝坊記

我

朝褒崇節孝雖窮檐隘巷有苦節者一經地方
大吏題請無存歿悉

旌表建坊典至隆也惟貧者往往無力籲請末由
以上聞湮沒弗彰者蓋不知凡幾余念之惻

然守夔之二年屬幕賓潘青齋爲擬呈冊結請式刊印千百頒發六邑俾校官司其事凡有舉報者立付以式使書姓名事略存之無絲毫擾累由是舉者踵相接不數月奉節一邑已二百餘家矣復出資覓鈔胥繕總冊達之制府乞彙題余念

恩旨不日當至先以五百金屬奉節令呂扉青購石擇地建總坊遍書名氏於其上時節孝祠亦就圯復以二百金屬經歷朱少肆新之其

奉節縣志

卷三十六

藝文

六十五

歿者悉得入祠祀余雖挂冠未及觀其成竊幸事竣之有日也夫化民成俗守土者之責民孰不嚮善有所觀感斯益奮興清節克彰堅操彌勵將六邑次第舉行民俗必蒸蒸日上不負

朝廷褒予之榮是卽余及扉青孳孳建坊之本意也夫

創修少陵書院碑記

呂

輝

知縣

天下之治道係乎人才天下之人才係乎學

校學校興而後人才出而後天下治
漢文翁開石室則士皆向化宋胡翼之創治
經治事兩齋則士各彬彬有序嗣後取用均
克裨益治道效莫大焉然造而就之執政者
之責耳歲庚午秋九月余蒞茲土詢以課士
之所闕如久矣訪諸東郊杜公祠者晉階書
院舊址也乃急重葺以爲諸生肄業處奈地
隔灤水春漲時發士多患之心代歉然壬申
冬復於縣學之偏得隙地高居山麓下瞰長

江爽塏極焉擬爲改遷士論懽然以爲得所
復捐資于癸酉春初鳩工夏六月竣事落成
之日乃進諸生而教之曰百工居肆以成其
事士能肄業以成其學亦如工之居肆以成
事也載議束修以爲延師資捐膏火爲激勵
助惟期多士執經問業月異日新力戒荒嬉
共圖實踐他時文學成就策名天府入爲廟
堂培元氣出爲黎庶正本原將一邑之人才
出而天下之治道隆焉余豈僅爲一邑幸哉

城工碑記

蒯德模 知府

同治十有一年歲壬申德模自江南入覲
天子奉簡命來典夔郡汎舟荆襄泝巫峽瞿唐而
上艤夔門信宿朝暎出沿岸人聲千萬作嘈
雜喧闐不可辨聽舳艫颿檣櫛比林立無隙
際日甫暝絲竹謳謠起水上與灩澦石瀼水
東西風浪撞擊相應答燈火照耀數十里達
旦明不絕洵川東巨郡也顧無城人家支柱
架屋於沙土峭削間顧視歆側岌岌若將墮

奉節縣志

卷三十六

藝文

六十七

者時雅州守徐公署其篆告予以九年夏大
水泛漲城沒洪波巨浪中過五丈臨江一面
崩塌傾陷無完址前守鮑公上之制府吳公
奏請修築檄太守彭公名湜觀察鍾公昌勤
後先估計議協役興功未半已財殫力痛矣
願緩之以俟能者隨謁大府亦諄諄以城工
諭蒞任視事進首令暨六邑官紳籌之而知
其難矣夫興役必資夫財築城必有其基蜀
遭藍李石逆亂頻年大水爲災派滇黔陝甘

援餉無虛歲民力盡安所得資且城瀕江時
櫻水患沙石蕩齧日迤下築旋圮有以種樹
扞堤之法進者亦需時日難效往余嘗督修
鎮江江甯郡城矣而因地制宜又未可拘以
成法噫吾知其難矣夫城又未可以其難而
遂置之也夔據吳楚之上游闢川蜀之門戶
常則關樞商賈爲國計之取資脫有意外虞
西守劍閣東守夔門實城都巴渝所倚重則
夔安可不城德謨籌之熟矣非規畫周詳實

心任事奚有成捐萬金倡請大府覆奏益其
資牒六縣官紳協助之數月鉅款具度地勢
高下陂者平之凹者增之屹立欹斜者堡衛
之植杉木土中密如蔗深丈餘以五層石約
束積累而上按軍中行伍法布署成功設十
棚樹旗棚有長督以官紳旗有率總以力役
取東洋廟磯險灘巨石鳩良工匠於屬邑俾
親信司筦鑰節度支而日與首令暨紳耆周
巡撫視畚者畱者運載者操作杆築者齊力

合作歌呼雜沓椎鑿丁丁然喧囂聒耳督役者亦持籌握算手口指畫伫立江干歷寒暑無倦容閱數月規模備踰年功竣是役也起壬申九月明年十二月訖事城高若干尺計雉堞堦口若干有奇甃堊冶鐵若干石費白錙若干萬兩袞廣若干丈工成日崇墉巍峙敵樓翼起女牆圍護周匝堅固壁立憑欄遙矚赤甲白鹽相向若犄犄而八陣石磧鍊柱溪俱歸控制令人昂頭天外作拱衛神京想

士民負郭列廛而居商舶官舫停止其下無不歡忻忭舞矯首游觀余惟天下事之廢興成毀不可得而知也人誠因利乘便繼長增高歷數千紀而有基無壞則雖謂公孫白帝之經營武鄉侯永安宮之舊治至今存可也否則善作不必善成圖始而無以繼其後風雨所剝蝕波濤所瀆薄卽金城百雉宏傑詭麗堅強而不可動搖者積久而亦化邱墟瓦礫之場而不可識其髣髴而况于此城與夫

城之恃以不敝者固大有在而不可聽諸天
時人事之自爲消息乘除也所以記其事並
以告後之撫有是城者

既濟會序

汪

鑑

知府

余以丙戌春蒞夔迄今再朞幸值風雨時五
穀熟實屬叨 神明之佑恭查夔城 廟祀
悉如典禮而 龍神祠居 火神祠之左且
稍上尤爲位置得宜意當初剏造早取既濟
之象故祈禱輒蒙 靈應兩年以來雨旣知

奉節縣志

卷三十六

藝文

七十

時火亦不甚爲災寅感 神庥愈不敢不益
修人事於是籌撥閒款四百金加以首縣捐
廉紳商集腋置備水龍並一應器具餘資交
稅房生息命每歲春秋舉行既濟會恭請
龍神神位安奉於 火神神位之左薦馨演
戲使在事紳董咸得與會以展誠敬且補民
間向無龍神會之缺典會前一日演習水龍
後一日清理帳目永以爲例日久積有餘資
仍當撙節續辦積谷每年推陳易新俾歸實

用不准踵事增華恣意浪費庶幾神罔時
恫惟是會以既濟名人皆謂取象以厭勝耳
余意則更有進焉易曰水在火上既濟君子
以思患而豫防之朱漢上曰水火相逮而後
濟然既濟之極水火相反其初故既濟之象
未濟藏焉君子不可不思慮以豫防其患此
余命名之意也至於防之之道則首在正人
心人能懲忿窒慾遏除一切詐欺曖昧縱恣
慆淫則卽古所謂心火不動天火不災此防

之之上策也每日小心檢點曲突徙薪時誦
袁子才白日青天莫放懷枯本朽株能爲難
二語以自警此防之中策也若余之所爲
籌款製器設會祈神且藉以聯絡眾志俾
有事時爭先恐後爲焦頭爛額之上賓此特
防之之下策耳然上中二策非得中人以上
之官紳爲之提撕警覺時以身心性命之學
相切磋則未易家喻戶曉惟下策粗而易舉
其效可覩亦未可視爲緩圖故旣爲勑會且

爲之記每季舉會之日眾紳董能讀此記默體於心以自勗勤宣於口以勸人則必感格神明不惟禦火災且可卻諸病將見歲豐人和災沴不作地方並受其福無須史巫紛若以爲禱禳此則余之所厚望也夫其餘章程業經首縣妥議呈核可卽照辦毋庸復贅既濟會碑記

潘樹申

夔郡當川楚之衝人煙湊集望衡對宇櫛比鱗次幸而無事則已不幸有事所當思患而

豫防者無如火災爲甚夫莫烈於火而制之者水也以水制火其必有引水之具而後足施救火之功也郡城踞江高遠艱於取水前守令創興利民井太平池亦旣得水較易而所引以救火者如水槍水炮之屬制作未精施用弗便故一旦火作水雖多而無濟街巷流濕就燥者仍復炎炎官吏趨督久乃得息人勞而功不彰者由救火之器弗善故耳善哉西洋水龍之法其救火利器乎制巧而精

用施而準郡人士習聞其善而苦於無力以致之也久矣今公祖汪公治夔之三年百廢俱修凡政之興利除弊者無弗爲也無弗思也思夫火政乃利弊之大者救之之法可百年而不用不可一日而不備爰捐俸百四十金購買西洋水龍二付八團團甲司其事及一切應用之物無弗具又慮人之弗齊心膂也復捐金五十每歲春秋仲會於景靈宮名曰旣濟以祈神庥兼集羣力也又慮歲久而

事或弛用或絀也復捐錢四百串交殷實紳商生息以爲遇事支用之費嗚呼公祖之不惜財而盡心火政如此其至也不誠法良而意美哉今而後有備無患矣顧人皆知公祖爲吾民弭有形之災癘而不知其弭無形之災癘者意更深也且其名是會曰旣濟在易水在火上旣濟君子以思患而豫防之夫水火一陰陽也陰陽之賦於物性者曰水火陰陽之占於人事者曰善惡易理如是也則以

水制火猶之以陽伏陰以善勝惡也使人盡知顧名而思義充類以至盡將見恐懼修省人心正於下而風俗以厚天道應於上而災癘不生其爲益豈淺鮮哉又况春秋來會講切修明無忘積薪之戒以爲先事之防則所謂水龍者備而不用可也是固公祖所厚望也夫亦卽吾民所共勉也夫

疏陳籌備東征並報到籍摺子 鮑 超

三月二十四日接准軍機大臣字寄三月初

奉節縣志

卷三十六

藝文

七十四

八日奉 上諭前因新疆回氛日熾迭經諭令鮑超整隊出關等因欽此臣跪誦之下仰見 廟算周詳無微不至於籌畫兵餉之際寓體恤將士之心私衷感激惟有涕零竊臣仰荷 殊恩給假回籍葬親二月初八日由鄂起程三月二十六日到籍因限期嚴迫晝夜奔馳途次阻風感受寒疾致前發舊傷未愈然以軍事在身不敢稍事稽遲到籍卽就近擇期力疾治辦喪事茲於苦塊之次奉到

恩諭並准於回籍後專摺奏報籌備西征一切情形聞命自天悚惶無地伏思臣東川下士西蜀庸材迺因采芑微勞濫列執轂顯爵方愧涓埃未報何期艱鉅重膺惟有勉矢愚誠倍加勤慎前沐聖恩高厚諭令移孝作忠側聞邊警頻仍不覺積憂成憤雖身未出玉門之外而心已馳瀚海之西竊揣西陲形勢大異東南風氣嚴寒幅員遼闊其地北界俄羅斯東界喀爾喀西界布魯特南

界烏斯藏東西七千餘里南北三千餘里雪山綿亙冰嶺迢遙又有不毛之沙山無水草之戈壁動輒數百里而遙必須囊水束芻裹糧策馬疾馳數晝夜始能與賊一遇現當回匪滋擾非厚積兵力多備馬隊不足以敷勦辦伏查臣舊帶兵勇一萬八千名當協勦東南賊匪時憑仗天威恪遵訓示將士協力兵機幸無貽誤原擬先後帶赴西征藉資驅策昨據臣委帶八千兵勇之記名提督宋

國永等稟稱該兵勇等因欠餉不願出關在途潰散臣不勝駭異當飛遣隨行得力部將前往查探彈壓免致別生事端因思委派婁雲慶所部留閩會勦之兵勇萬人年久疲羸閩事平後卽該兵勇情願出關挑選精銳恐亦無多况道遠軍懸緩不濟急此次西征期迫不得不創立營頭從新招募臣擬照舊帶兵勇原額選募步隊一萬四千馬隊四千計一萬八千外再就川營挑選熟習邊情曾任

征戰精銳制兵二千以爲嚮導其將弁亦由臣指調茲尙有隨帶舊時將弁俟新營立後卽以舊將練新兵舊弁練新勇統由臣親身指示務使士知將意將識士情心性相孚險危共命然後臨陣可收指臂之效况邊地苦寒非精壯之人不能耐辛勞而支嚴冷故必選精練熟而後可成節制之師不獨練兵尤當練將不獨練陣尤當練心不獨練人尤當練馬務使二萬人如一人呼吸相通進退如

意而後訓練功成前次四川督臣欲以階州一軍交臣統帶意在息力節費非不甚善第此軍非由親手募練倉卒恐難得力俟開募就緒再行酌覆此籌備西征練兵之大略情形也夫勦賊固須練兵而練兵先須籌餉必先備兩月之餉而後可以開募又必先備三月之餉而後可以啟行合計必先集五月兵餉而後辦事不憂棘手否則餉未備而遽開招必致招未齊而餉隨罄不能成軍遑計啟

行此大困之道也至於邊地利用騎戰購馬尤爲要需現咨四川督臣就近於夔關厘局先撥銀七萬兩及兩江督臣咨撥之三萬兩俟到齊卽分遣員弁前往廣東北口採買洋鎗馬匹如有不敷再商動撥此外募勇經費及軍裝器械各項需用甚鉅現奉諭旨飭令駱秉章先行籌款撥濟俾得及早成行臣自當遵旨咨商辦理至臣指撥九省兵餉僅准山西撫臣來咨許撥地丁十萬按月批

解餘省尙無確款總數合無仰懇 天恩俯
念軍需緊急 飭各省督撫未經議覆者卽
行議覆已經議覆者卽行撥解於萬難兼顧
之時設通融協濟之法在於何項款下每月
源源撥解若干總期款皆有著解不悞期俾
臣一軍二萬人月餉不憂缺乏庶幾士飽馬
騰勦辦可期得手早一日解伊犁被圍之困
卽早一日釋 聖主西顧之憂此臣効命之
至願也至此次行軍餉必隨兵而進兵必護

餉而行緣出關勦賊路必由甘而甘省所在
有賊旣須迎擊當頭之寇奪路而行又須防
備抄尾之賊截糧而去蓋軍行一遇伏莽必
至腹背受敵首尾不能相顧故必先勦梗途
之賊而後可以安行出塞之兵正不必俟甘
省全行肅清始行前進但阻軍行卽予殄滅
所以防後患而保全軍餉也關外平沙廣漠
曠無人煙必須計月裹糧方可深入故兵餉
必預給師期必預定統計現到兵餉若干足

供一軍幾月之用然後可以剋期進剿否則不能輕易出關此籌備西征餉項之大略情形也茲聞邊烽日急疊奉諭旨嚴催不論限滿未滿迅速出關援救臣竈窳甫就衰經未除茹泣含悲仰維宵旰焦勞則眠餐俱廢俯念邊城危急則立坐不安既不敢補請終喪更不敢稍懷偷惰惟是各省餉項尙無確款總數亦未據解到分釐而臣此番創立新營需費浩大每月軍餉約計十七八萬兩

現在空懷焦灼其實一籌莫展再四思維臣未成軍以前所有募勇經費及買馬製械各項四川督臣自應遵旨設法籌撥以便及早成行臣旣啟行以後所需各省月餉無論已到未到可否仰邀恩旨一併飭交四川督臣駱秉章代臣經理催收俾臣得以專意剿賊不分心於催餉不掣肘於缺糧該將士等自當倍加感奮踴躍爭先至如何在於四川省城設立糧台之處可否卽倣照道光六

年前提督楊遇春西征成案由該督臣斟酌
辦理想該督臣公忠體國素顧大局必能籌
備盡善不悞軍行臣惟有激發天良俟募勇
畢後率師啟行到甘體察情形緩急相機迅
速整隊出關徑赴哈密剋期進剿以期迅掃
回氛仰副 朝廷靖逆安邊之至意
疏陳籌備入衛摺子
鮑 超
臣昨接閱邸抄並中外來函皆以俄人和約
未成恐勢須用兵而各路邊防尤爲方今急

務臣受 恩深重感激逾恆雖在籍養疴嘗
思效命疆場力圖報稱今國家多事之秋正
臣子致身之日何敢以傷病未愈自耽安逸
更不敢以春水方漲驛路艱難稍有延宕臣
擇於三月初十日由水路起程等語旋又奏
言臣於二月二十四日亥刻已將起程日期
由驛具奏在案茲於二月二十七日准督臣
丁寶楨二月初八日由驛五百里咨奉 上
諭前浙江提督鮑超著丁寶楨傳旨飭令來

京陞見等因欽此臣跪讀之下感悚難名伏思用兵之道貴能先發制人臣之舊部自遣撤後已回各省原籍而四川兩湖爲多兩湖又以湖南爲多從新招集成軍動需時日若必待臣入都 陛見面聆 聖訓後始行調募則往來道途已逾三月之久深慮緩不濟急致誤事機臣除將川中舊部將弁先行調集隨帶赴楚一面飛飭湖南湖北兩省舊部將弁齊集湖北適中之地已派員前往布置

一切一面舍舟登陸由宜昌樊城赴都如途中接奉 諭旨允准臣卽轉飭諸將廣爲招募認真訓練俟臣 陛辭赴楚約計已逾數旬所練諸軍當有成效惟臣當日統率步隊三十餘營現在擬招步隊三十營除營務處親兵百名外再加招親兵一營共三十一營又當日霆軍馬隊十二營帶吉林馬隊二營共十四營今擬招馬隊十五營總共馬步隊四十六營查向章楚軍湘勇每營五百人原

日霆軍虎勇每營六百人口糧則照楚軍章程人數仍照霆軍章程方足以敷分布核算每月共需軍餉一十六萬有奇其餉項銀兩應請 飭下各直省督撫臣委派大員辦理糧臺隨營支發俾臣無經理餉項之責得以專意戎行軍中以火器爲先除守營大礮外行隊每營劈山礮二桿步隊槍矛各半合算共需矛頭來福洋鎗九千三百桿後門洋鎗六百桿每桿丁字火五百馬鎗三千桿六响

丁字火短洋鎗五百七十桿每桿丁字火五百所有洋藥洋火均應廣爲儲備源源接濟可否請 旨飭下兩江廣東督臣委員迅速採辦解往湖北應用並請飭下湖南湖北督撫臣俟臣派定統領營哨咨定章程後尙須發給劈山礮六十桿至於鑼鍋帳棚鋤鏟斧鋤旗幟刀矛等件俱營中必需之物務須先期趕辦以免臨時缺乏等語又附奏言記名提督直隸通永鎮總兵唐仁廉勇敢善戰原

係霆軍第一驍將可否請 旨飭下直隸督
臣李鴻章轉飭該鎮仍舊歸併霆軍之處伏
候 聖裁至福建駐省霆慶二營亦臣舊部
素稱勁旅並請 飭閩浙督臣何璟飭令來
營聽候調遣如閩省以防守需人則現署福
建陸路提督孫開華亦係霆軍健將久爲台
灣生番所畏服足資捍禦且部下勇將尙多
在閩省不盡恃此兩營而歸併臣部爲一軍
則可收指臂之效等語又附奏言臣請先事

調募在未奉 諭旨統兵之前議者或以爲
操之過蹙且迹近專擅不知倉卒臨戎兵家
所忌有備無患自古爲然此次倘蒙 福蔭
不用一兵不折一矢而中夏又安外洋恭順
固薄海臣民所深慶臣所調諸將皆係舊部
已飭令自備資斧不難立時遣散萬一邊疆
蠢動則防範在先布置周密彼必不能得志
疏陳預備戰守以顧根本摺子 鮑 超
自古備邊之策能守而後能戰能戰而後能

和不可恃其不來當恃我之有備俄人水師
鐵甲已集遼海東洋陸軍已逼琿春海舶商
賈往來其間者實見軍容之盛不僅虛聲恫
喝也幸而能以理喻或可不卽興戎儻竟乘
虛而來舍戰更無良策臣詳考地勢琿春陸
路至威遠門不及千里是爲奉天吉林之關
鍵儻或由此內犯則進邊門而拊盛京之
背西則由馬千總台出廣甯錦州之後而趨
熱河若由錦州循邊牆梨水溝鳴水門而進

喜峰口尤深入內地之捷徑也水路由混同
江越黑龍江口以入松花江可直抵三姓伯
都訥等處儻或以水師來攻則黑龍江非復
我有而吉林腹背受敵矣若由奉天南循遼
海則金州廳所屬之大凌灣小平島旅順口
錦州府屬之天橋廠甯遠州屬之約魚臺等
處皆可泊舟登岸儻或由此進兵則吉林奉
天腹背均受敵矣且天橋廠釣魚台距山海
關皆不甚遠儻舍舟就陸超越奉吉防軍之

前進喜峰口以達遵化州勢必震動 神京
不可不先爲戒備奉天門戶緊要早在 九
重洞鑿之中此日委任親賢通籌全局凡有
雄關要隘鎖鑰重重竊料 聖慮周詳必已
算無遺策自山海關以至北塘海口五百餘
里雖防不勝防而李鴻章曾國荃所部各軍
分布如常山蛇不難首尾相應臣則秣馬勵
兵以夜繼日所挑將領非隨臣身經數百戰
者概不入選臣復親加訓練教以忠義以作

其敢死之氣萬一有警無論遠近臣卽親督
馬步各軍裹帶乾糧星馳援勦先以保衛京
畿爲第一要著儻敵兵由山海關西北各口
入永平府屬之撫甯盧龍界內則霆軍實當
其衝臣誓當四面截擊斷其歸路必使片甲
不返以伸 天討而快人心惟中外情形不
同用兵各有長短洋人所恃者鎗礮耳製造
之精今日愈出愈奇鎗礮而外別無長技臣
向來教戰五成戈矛以鎗礮排列於前卽以

戈矛相間而進兩軍相薄戈矛突出鎗礮之前直撲敵人而敵人火器雖精無所施其伎倆此霆軍之所長也以我之所長攻彼之所短不難百戰百勝然而火器不及外洋之利又必求工力悉敵之鎗礮使其無懈可擊而後吾無所短嘗聞普法交戰普國火器精良鎗子迭出甚速而法國之鎗機鈍子遲普遂以弱小之國而俘法之國王一器也而成敗繫之敢不先事講求以期有備無患臣昨過

上海以萬餘金購有各種洋鎗取其價廉上藥者先令各營操習期於發無不中考洋鎗中之迅利輕便者莫如馬地利並呶啫士得兩種電掣雷轟爲行軍第一利器臣擬卽如式購備七千餘枝每枝配帶子藥五百顆價值約二十五六兩合計非寶銀十八萬兩不能採辦齊全營中無款可籌惟有仰懇 天恩賞准發撥鎗價俾取精而用宏庶同仇而敵愾明知庫款支絀苟非實在要需敢不力

求搏節舉凡貴重礮位自數千兩以至數萬兩者雖利於攻擊臣概弗敢請獨此洋鎗士卒恃以開行陣之先方可用戈矛以攻敵人之短而能制其死命如蒙 俯允可否卽請飭下兩江督臣或於揚州鹽務內借撥實銀十八萬兩由臣委員馳往請領就近在上海香港定購剋期裝運來營以備戰守而免貽誤自古無必勝之兵而有必勝之將往時粵逆捻匪縱橫屠掠海內幾無完土而疆臣及

各路統兵大員仰承 廟謨同心滅賊卽臣從事於諸臣之後雖悍鷙如四眼狗等臣皆以偏師常破數十萬之眾而能使海宇廓清者氣足以勝之也况今 宮廷自治凡有可以振作者無不立見施行而內外臣工所以籌自強之策者又皆不遺餘力人心固結士氣弗衰機會之來時不可失果能得此利器儻俄人輕敵而來則沿海旌旗一指麾間不難立繫夷酋之頸待其窮蹙乞命震懾 天

威然後許其請和兵可百年不用也事可操
券間不容髮臣非敢以匹夫之勇妄陳於君
父之前誠以敵寇憑陵戎機已露迫切上陳
自忘愚昧

鮑忠壯公傳



公諱超字春霆蜀東奉節人年十七入行伍
卽心慕古名將之行軍咸豐初髮逆擾粵西
向忠武公首爲追勦公曰此大丈夫建功立
業時也毅然請行各大帥爭相獎拔曾文正

奉節縣志

卷三十六

藝文

八十八

公尤器識焉調赴水師營分帶長龍戰艦隸
楊宮保厚菴麾下所向有功破蘄州剿武穴
趣援武昌又受知胡文忠公命督水師中營
擊賊青山等處賊據金口公率所部奮擊炮
子拂左肋皮肉焦破吐血盈升金口雖復而
公憊矣論功疊膺保薦創未痊裹肋戰九江
賊見旗皆遁數百里江面肅清士卒方獲休
息胡公檄會陸營擊賊武昌公日數誅賊分
隊兜剿賊食息不遑旬日克縣城大帥僉薦

公有大將才足當一面 奏募湘勇剗立霆
字一軍自此受知愈深圖報之心愈激小池
口之役賊踞僞城日久益堅公誓眾急攻乘
夜薄城下鼓勇先登滾木傷左臂墜起攻益
力又傷右股不少退忽頂門中鉛子漿血迸
流昏然遂暝部下捄回氣僅如絲心有餘熱
出子傅葯數日始甦初張目猶作叱咤聲蓋
死而復生矣傷口未合又有渡河橋之戰繼
援黃梅黃梅賊壘周遭密布公出奇設伏一

掃平之旋移兵援宿松太湖復黃安麻城時
奉 特旨補授湖南綏靖總兵公受方鎮之
寄感奮愈切分兵駐扼二郎河各營願當前
敵咸豐十年正月諸路賊紛集勢甚鴟張小
池驛緊逼賊砦移軍蹙之賊初集謀未合也
公密要各營舉火爲號合隊圍剿賊大創斬
馘萬人餘皆遠竄公積勞旣久傷疾有加以
母在籍卧病因乞假歸侍母病稍痊催令回
營時東南事棘不敢偷安力疾到營而舊創

猶未愈也既而攻克洋塘後胡公 奏派公
爲游奕之師得專進退於是不能少息安慶
圍急率師揀之圍甫解而江西股匪復熾白
馬寨廣信等處皆陷而安徽之賊又據青陽
公旣撲股匪轉克定陵僞將僞王收降麾下
朝廷獎賚優加同治元年升補浙江提督是
秋軍中大疫移駐蕪湖十一月聞訃丁母憂
顛懇開缺奔喪 廷議不許改爲署理奪情
視事公憶在楚時丁父憂亦不獲請終制悲

傷感泣病益增劇明年以墨經泣戎進次無
爲復巢縣和州各城皖北賊全退又渡江助
圍金陵期滅巨寇克復大都分部屬攻旁近
州縣句容金壇十餘城次第平定三年夏奉
援江西之 命急趨赴之戰無虛日僞王陳
炳文降麾下全省肅清 上諭褒嘉賞錫一
等子爵前後 頒賜疊沛 殊恩在江西時
請假歸葬旋奉剿辦新疆之 旨兼程回籍
粗畢葬事募勁旅將啓行又奉 命追剿閩

廣竄逆卽還江西督軍前進嘉應州平髮逆
全股殄滅初以相公嶺之捷值江甯克復蒙
恩賞輕車都尉至此復蒙 恩加一雲騎尉
兩承世職會捻匪出沒楚豫公盪河南之寇
解鄂省之圍轉戰數月窮追遺類常十餘日
不得寢內地肅清中原靜謐乃陳請裁撤於
同治七年養疴歸里傷多病痼驟難復原光
緒六年正月奉 嚴旨召見扶病起程至通
州奉 旨補授湖南提督到京後 陛見

奉節縣志

卷三十六

藝文

九十一

陛辭均蒙 溫諭未及抵任值外洋滋事奉
命集舊部會辦海防成軍趨駐樂亭旋聞議
款卽遣撤入覲飭赴原任奔馳勞頓觸發舊
傷途次武昌 奏請開缺未兩載兵起越南
公聞之忿甚適奉 上命出征異域公卽飛
調舊部募勇成軍雖以重傷之軀入瘴癘之
鄉旣衰且病仍奮不顧身長趨徑赴至廣南
行成已定遵 旨遣還因肝氣上冲請回籍
寢食不安每嘆和局不可恃戰備不可疎能

戰乃能和爲從古不刊之論亟欲遵 旨到
京 陛見面陳善後事宜奈氣血益虧勢難
啟行伏枕呻吟口授遺摺終以 國恩未報
爲憾夫公由偏裨膺專闡蒙 三朝之殊遇
荷五等之 榮封廿餘年來瀕危者指不勝
屈惟鞠躬盡瘁中外皆共見共聞云謚忠壯
贈太子少保

奉節縣志卷三十六

賦彙

北客賦

宋 趙奭之

北客宦遊巴楚歷三峽之險而抵永安故區
地勢近瘴兩見盛夏官居民廬皆在山麓鑿
地數百尺而不及泉故市無井里無醫客患
之勉同市人飲諸瀼水而苦滓穢引之澗谷
而思蛇毒俄有老叟謂客曰漕府廉臺有二
井焉泉冽而甘盍往汲之客曰使者之庭閭

奉節縣志

卷三十六

賦彙

九十三

人嚴守而應接有時甚非羈旅所敢妄千叟
莞爾而笑曰子胡不采之風謠質之行事善
利濟眾初不禁也客於是拜其言感其意而
往汲焉迨今逾年暑無瘴暍之苦而得以安
居是使者之惠也輒賦其事而抒素云其辭
曰

北客伶俜陟彼崔嵬南游巴楚實仕于夔歷
白帝之區域眺赤甲之嶮巖瞰灩澦之出沒
峙瞿唐之巍巍觀楚國之絕塞悼蜀宮之故

基客喟然嘆曰昔窮兵百戰用武之地也仰
面無覩但見林莽蒼鬱岬岵岸峿巘雲獠煙
霍霽一色三時豫和炎夏爲厄逢辰久安用
夏變貊歲袞聯郭龍勢蛇迹官府民廬棧阜
構麓八家無井而不能革客患之而同市人
臨灤津雜滓穢及黃齋渙湲之流汨人精神
乃訪屣屨之下臨嶙峋之曲千人挈壺百穴
漱玉清清泠泠而冰敷雪沃未幾有叟呼於
列曰子曾不知不毛之瀘自此塗出葶薈叢

滋虺蝮潛匿炎毒之厲而是生百疾溪流可
酌而中有沙蟲寔大梁之公子胡不自衛而
反蹈其失客謀於叟爲之奈何貧如顏回而
有飲瓢之樂曠如孺子而有濯纓之歌叟豈
能漑我以甘露濡其旱禾叟於是逡巡若避
赧然變色僕游塵世安有神術徒知夫西有
漕府東有廉臺方布天子之仁澤救斯民之
旱災烏能秘一縉之清渫坐視游子之炎埃
客釋然解疑僕僕駿馳中涓斂衽下氣以道

使者之德音自云汲之引之周浹旁及而閭
無夜閉雖負缺以遊濯類抱甕而爲隧請觀
夫易卦曰井養不窮兮收而勿幕又稽之老
氏曰幾於道兮善利萬物散爲四海之惠不
止匹夫之恤噫鼯鼠飲河而不過滿腹鷓鴣
巢林而不過一枝苟足各有其極雖多亦奚
以爲故蘭臺之風不及於甕牖而楚子作賦
西江之水罔濟夫轍鮒而波臣見譏客於是
缺然感慨頽然下拜明旣能哲佩以爲戒信

奉節縣志

卷三十六

賦彙

九十五

乎君子之淡以成交久而不壞

灩澦堆賦

蘇軾

世以瞿唐峽口灩澦堆爲天下之至險凡覆
舟者皆歸咎於此石以余觀之蓋有功於斯
人者夫蜀江會百水而至於夔瀾漫浩汗橫
放於大野而峽之大小曾不及其十一苟先
無以齟齬於其間則江之遠來奔騰迅快盡
銳於瞿唐之口則其險悍可畏當不啻於今
耳因爲之賦以待好事者試觀而思之

天下之至信者惟水而已江河之大四海之深而可以意揣唯其不自爲形而因物以賦形是故千變萬化而有必然之理掀騰勃怒萬夫不敢前兮宛然聽命唯聖人之所使予泊舟乎瞿唐之口而觀乎灩澦之崔嵬然後知其所以開峽而不去者固有以也蜀江遠來兮浩漫漫之平沙行千里而未嘗齟齬兮其意驕逞而不可催忽峽口之逼窄兮納萬頃於一盃方其未知有峽也而戰乎灩澦之

奉節縣志

卷三十六

賦彙

九十六

下喧豧震掉盡力以與石鬪勃乎若萬騎之西來忽孤城之當道鈎援臨衝畢至於其下兮城堅而不可取矢盡劍折兮迤邐循城而東去於是滔滔汨汨入峽安行而不敢怒嗟夫物固有以安而生變兮亦有以用危而求安得吾說而推之兮亦足以知物理之固然

灩澦堆賦

薛 紱

蜀江匯而赴峽勢迫抑而騰掀當江之中有堆屹然爰停我橈徘徊覽觀有會余心乃知

大禹所以浚川而不去此者匪特以殺水之怒而四瀆之長江存灩澦河存砥柱則聖人之意亦將有所寓焉夫形而上者謂之道形而下者謂之器器者物之物道者物之先先乎物者在人則存乎心者所以宰制乎萬物豈一物所得而肩彼堆斯江彼柱斯河在物之時而器之下也然洪水滔天不爲之移狂濤卷空不爲之動潦盡漲涸岌乎峭堅亘宇宙而長存閱陵谷之變遷而人之所以先乎

物者乃誘於知乃逐於物利之趨如水斯下欲之熾如火斯燃曾莫得以止遏者反茲石之不若又安可不推其原縱而忘反茲故弗道制之無方逾蕩而偏禁而絕之者昧乎倫類空而妙之者荒無逕躔嗚呼無廬而居無畔而田卒窮露而奚歸甯耕穫而有年曷不觀於茲堆乎彼惟居其所者屹而故也然後可以障狂瀆之流川苟失其所而昧其居吾知此心之不傳其居伊何曰天理雖微而難

明實天命之固然自視聽言動之間以及於君臣父子之懿物必有則理不可遷切而思之講而明之習而察之謝無根之潢潦挹有本之源泉眇乎其微深乎其淵物有萬變事有萬理察乎其微者卓然而不可易然後可以蔽乎天地而關乎聖賢必真知也而後其行也果必力行也而後其知也全敬恭朝夕奉而折旋茲孔孟之所以不倦不愠不怍者豈蹈白刃之勇者所得而言嗚呼人心之

奉節縣志

卷三十六

賦彙

九十八

微匪石而人欲之勝甚於水吾觀茲堆而有感於天則之嚴是以憂講學之怠述之於篇
八陣臺賦
劉望之

靄孤臺之嶷然臨千步之沙場石離離其斑斑紛栖雁之未翔山暝黑而更惡水雖波而不揚澹徙倚其不去含鬱紆之內傷是何以使之然哉客或告之在漢之亡有人超然卧鄧南陽甚似阿衡渠樂未央感成湯之至意姑黽俛而徂征又似子房初未有意赤帝之

子也及其既作亦不能已手胼足胝夙夜傾
否忽一龍與一鳳蓋亦未可以優劣計大兵
初來雷電下空璋孱小兒孰嬰我鋒駐師江
郊坐向必東蒐我卒乘取彼凶殘中原有狐
憑陵宮垣我不往取高帝在天眾識卯金之
不可復而况夫子之賢也運去道窮嘔血繼
之非公實愚愚者不知自古聖賢亦行其義
道之不濟已知之矣相夫子之所立固已無
窮而不訾彼曹操孫權烏雀犬彘之竊食雖

奉節縣志

卷三十六

賦彙

九十九

甚饜而不免其驚疑愍世俗之隘陋徒顧瞻
而涕洟請舉酒以酌公混一笑於江麋

八陣圖賦

元 楊維禎

遐哉邈乎蠶叢故墟劔閣崢嶸兮石棧縈紆
車不得而運兮馬不得以驅非王業之所基
兮徒抗險乎中都帝山中之苗裔兮迺猶厄
此斗隅黃星射乎宋野兮強獬狝乎江之東
偉伏龍之感激兮起左顧乎隆中允識時之
俊傑兮吞餘子於一空圖八陣以用武兮必

先天而獨得六十四之成算兮本馬圖之全
畫三十二之岐分兮妙陰陽之互宅天地衝
軸兮風雲盤辟龍飛鳥逝兮蛇蟠虎翼撓之
無跡兮運之無方進退不愆兮出沒靡常奇
不失於正正兮恠不越於堂堂伏至動於至
靜兮喻能柔於能剛喻以常山之蛇勢兮曾
未測其望洋巴之水兮砮崖折壁峽之濤兮
風霆礚礚彼箕張而翼布兮曾不轉其硯石
非神物之陰衛兮孰萬夫之捍力想貔貅之

對壘兮指白羽之一麾運縱擒於掌握兮算
不出於八奇賊之望而走兮甘巾幘之受雌
按渭濱之所屯兮實鼎國之王師自風后之
有圖兮肆獯蚩之赫伐逮尙父之六弢兮佐
牧野之黃鉞孫吳爲之剽掠兮徒生靈之肉
血鄙敗事於腐儒兮彼譙生其何法茲八陣
之先覺兮軼軒皇與天老曰流馬與木牛兮
又神機之所造歟中營之告變兮哀夫人之
奪蚤訖黃芒以當天兮掩炎精之皜皜嗚呼

西望岷峩兮南泊錦江山川相繆兮地老天
荒歌梁父兮醜吾觴招謫仙兮呼子長訪魚
復之砂磧兮弔新都之戰場雖武無用於今
之時兮亦以發吾文之氣剛

灩澦堆賦

明 郭 棐

睠瞿唐之浩瀚吞百川於一畝肆犇漭而千
里載滌洄於三峽儼茲石之孤起水匯之而
淤凜抗流澌之橫放壯地氣之呼吸蓋鎮夔
軸以長存峩砥柱而中立者也原灩澦之鑄

奉節縣志

卷三十六

賦彙

一百一

形岬滄波之尋丈旣挺躍而若馬亦蹲峙而
如象固自植之根蒂任狂流之蕩漾捍蜀川
之門戶作荆襄之保障偉片石之爲功洵亘
古而莫尙卽吾人以鍾靈乃振世之豪傑張
浩氣於獨立植人紀於旣絕標格天之勳庸
樹蓋世之功烈旣炳烺而磊落亦崢嶸而岷
嶻矧鍾茲之環特聚來遊之雋哲豈無障百
川而東之與茲堆而並列者乎是故有如昭
烈拯漢末造氣吞操瞞力驅吳獠百戰艱難

三分控抱若堆斯
堅子屹蒼昊有如諸葛濟
時人龍托孤授政盡瘁鞠躬將星弗隕仲達
必窮若堆斯植氣橫白虹有如雲長髯修且
揚明燭達旦志嚴秋霜樊城之圍聲振荆揚
若堆斯壯樹我天常有如翼德鐵面突兀長
鏢風馳神駒電飈變起侍帳心明皎日若堆
斯挺精爽不泆有如工部樹幟詩壇內篤忠
懇外歷艱難一飯不忘千載所嘆若堆斯固
大節孤撐有如康節學究先天居夔有咏演

易有傳心勤觀象淚墮聞鶡若堆斯嚴範茲
東川有如梅溪攬權獻策忤彼巨奸因之外
謫馬綱抗疏義泉遺澤若堆斯正爰立臣極
繫昔賢之幹世運奚啻夫灑灑之障頽波在
地爲茲堆之岨嶮於人爲氣節之嵯峨豁古
今之大觀詎坎流之殊科諒茲心之貞白又
遑卹乎其他苟吾力之能殫胡可委世變於
江河指前修以作則礪貞石而礪磨切予衷
之仰止望灑灑而高歌歌曰川水瀾漫兮夔

石巖嶭波有堆兮士有節苟弗自立兮非潰
則裂吁嗟士兮視此石兮百挫而不折兮

謁義正祠賦

郭棐

夔之東爲白帝城其中巋然峙者爲義正祠
以祀漢昭烈帝配以孔明關張紀德報功載
在祀典予叨守夔視篆之三日拜謁祠下感
往躅而嘆焉其詞曰猗帝中山之華耀兮痛
金精之霧矇仗孤劔以躍起兮掃羣飛之莽
蜂偉桃源之義聚兮思踵躅於沛豐彼雲長

奉節縣志

卷三十六

賦彙

一百三

與翼德兮均萬夫之雄鋒挺昂昂之姱節兮
豈錚錚之可同維帝能翕張之兮遂咸勵夫
赤衷思經綸之茂闡兮有諸葛之人龍苟一
出以亨皇路兮又奚惜三顧於隆中旣精神
之孚契兮迺魚水之相從慨樊城之威震兮
空灑恨於阿蒙悵當陽之追北兮竟返眞於
安宮揭肝膽以顧遺兮諒茲心之孤忠爰許
帝以馳驅兮臣亦何愛於厥功陳二表以率
師兮誕三出於祁峰甘巾幘之見辱兮知仲

達之已窮胡天之不祚漢兮殞將星之瞳矐
徒驚嘆於奇才兮竟墮淚於英雄嗟帝與三
臣之傑特兮亦無捄乎漢運之攸終信天心
之不易謀兮豈人力之能爲工絜白帝之嶠
岬兮允靈氣之所鍾愧廟貌之赫奕兮儼棟
宇之窮窿配三川以並永兮亘萬禩其來崇
視曹瞞與吳獠兮奚啻蜾蠃之與蟻螻嗟余
承紫宸之庥命兮攬五馬之殊庸追鴻勳於
漢上兮採盛徽於蜀東偉經畫之如存兮邈

奉節縣志

卷三十六

賦彙

一百四

玄漠之罕通敬陳詞以奠醑兮殫守土之虔
恭冀精靈之來格兮尙愍念此邦之疲瘞旌
旗影兮蕭蕭鐘鼓聲兮逢逢神之往來兮猓
翀乘蒼螭兮駕青虹醑酒滌兮維馨牲牲潔
兮維豐神之降鑒兮惠時雨而扇和風

八陣圖賦

國朝

楊

崇

粵自瞿唐天險巫峽神工一水中斷兩岸凌
空夔門鎖鑰全蜀咽喉古王公之設險僅一
夫而可容當其吳魏僭號西蜀專征南陽一

起定策三分羨君臣之魚水勞劈畫於江濱
運神機以列陣聚頑石而成兵象其陰陽配
乎五行中按八卦外列八門銳直交變方圓
互更虛實聯絡奇正相生走九曲於沙岸散
五花於水濱留千載之妙用垂百世之經綸
時而錦江日暖玉壘雪消全川奔峽萬派爭
潮排空振浪拍岸飛濤圖勢之嵯峨兮陣陣
翻卷水聲之澎湃兮層層怒號蛟龍之出沒
兮驚壁壘而戰鬪鷗鷺之翔集兮疑部伍以

飄搖同河伯之官兮參差數頃擬馮夷之窟
兮照徹重霄黃牛峽湧白馬灘高望陣圖而
不見徒指點於東郊至若木脫江冷水落石
出舊磧競浮平沙漫暴蛇鳥盤旋魚龍潛伏
風蕭蕭兮慘澹日高高兮溶旭望赤甲之崢
嶸兮似霞瞻白鹽之聳峙兮如玉斯時也則
有舟人漁子賈客湖商碧渚收纜芳洲停檣
見夫亂石纍纍一圖茫茫或大或小或圓或
方堆堆壁立疊疊峯行聚若蟻附散若星光

總莫測其橫縱孰能度其短長豈大士之聚
石而說法亦漁翁之設罟以鋪網更有繡腕
名賢賦心才士載酒徵詩揮毫覓句感漢業
之成敗弔蜀都之興廢憶籌畫於當年嘆忠
貞之盡瘁何殊懷秦劍於西河允矣遡周城
於洛水俄而灩澦暗魚復昏江鼉吼風姨鳴
陣沙飛捲隊石玎錚淒淒冷冷漠漠溟溟旣
雷轟兮電掣復猿嘯兮虎蹲偏伍彌縫兮羅
天網地笳鼓幽隱兮泣鬼驚神彷彿常山兮

旋轉想象魚麗兮繽紛較牟彌之圖兮形勢
更勝比棋盤之陣兮變化愈靈嗟乎當圖之
設也君臣一德士卒同心高牙大纛羽扇綸
巾冠蓋擁衛兮滿於南浦劔戟森列兮遍乎
東津舳艫蔽江兮鱗次車騎環野兮雲屯連
吳藉力兮氣吞荆楚拒曹除逆兮威控西秦
無何白帝受命兮專託幼主永安崩位兮任
責老臣祁山六出兮慮漢賊之兩立星隕五
丈兮憾王業之難成雖偏安於蜀都兮不負

三顧知遇寄遺踪於江湄兮常留萬古忠魂

奉節縣志

卷二十六

賦彙

一百七